

# **Hiburu**

## **Hiburu mar kura Yesu nurd untij hitte asanj katinj**

*Al Kurunj Urminj Yesube kurunj wor po*

<sup>1</sup> Bikkenjbe Al Kurunj belenj asininij yago mere yire yenjbe mere basanj marminj porofet wawunj budamde yad yerke wanj asininij yago mere yirde hinhan. Goyenterbe porofet gore asininij yago daha mat bebak tiwonj yenj mere yird yird belnej kurayen kurayen mat mere yirde hinhan.

<sup>2</sup> Goyenbe kunj kunj nalu funanj belenj henj hikeb Al Kurunj belenj Urminj tenj kerke katenjbe Al Kurunjen mere momonj dirinj. Yenjbe det kurunj gate minj al hiyyen yenj Al Kurunj belenj basinja irinj. Irdeb Urminj goyen hitte mat nanjinja megenya kurunj goyen yirinj. <sup>3</sup> Yenjbe Al Kurunjen denjem tunjnj yanj wor po goyen kawan forok irde hi. Irde Al Kurunjbe al dahade wor po goyen Urminj hitte matbe kenjelak wor po kenenj bebak tenj hityen. Irdeb Urminj gote merebe tonnenj yanj wor po geb, nanjinja megenya irde det kurunj gayen mohonde po yekeb tunjanj gasunenjanj po hanj. Yenjbe alya bereyat mata bulunminj halde yunenj yunenj metenj pasi irdeb Al Kurunj sanjinminj kurunj wor po goyen hitte hurkunj hanij yase belenj mat keperde Doyanj Al Kurunj hirinj.

*Yesube Al Kurunjen miyonj gote folek*

<sup>4</sup> Al gobe Al Kurun belen ‘Urne’ inyin. Munan miyonminbe “meten marne” yinyin. Ningeb Urminbe Al Kurunyen miyon buda kurun gote folek wor po. <sup>5</sup> Gobe Al Kurun belen yen ge amanen nurde unen hiyen geb, gogo gwaha iryin. Ningeb goke tenbe Al Kurun belen gaha inyin:

“Gebe Urne wor po haha. Irkeb han kab nebe Adoge wor po hihim,” inyin. *Tikin 2:7*  
Irde mere kurabe gahade:

“Nebe Nanin hemekeb yenbe Urne hiyyen,” yirin.  
*2 Samuel 7:14*

Mere gobe Al Kurun belen miyonmin kura goke ma yirin. <sup>6</sup> Irde Al Kurunbe Urmin un kuren mun goyen megen nin alya bereyat Doyan Al Kurun iryin goke tenbe Urne Matalin inyin. Ningeb Urmin Matalin goyen megen gar ten kerke wayen tikeyab Urmin goke yirin goyen asanminde gahade katin hi:

“Al Kurunyen miyon kurun gayen tumnan yen dolon irde hinayin,” yitin hi. *Tikin 2:7; 89:26-27*

<sup>7</sup> Irdeb Al Kurun dilinde miyonminbe Urmin yara mon geb, goke asanminde gahade katin hi:

“Al Kurunyen meten mar miyonminbe meremin po gama irde han.

Ningeb Al Kurun belen mene yire yenbe mene yiryen, munan kak melak ulin po yire yenbe gwahade po yiryen,” yirin. *Tikin 104:4*

<sup>8</sup> Goyenpoga Urmin gokeb asanminde gahade katin hi:

“Al Kurun, ge belen alya bereyage doyan yirde ha gobe hubu ma hiyyen, gwahader hiyen.

Irde doyan yirde henyabe mata huwak mat po doyan yirde hayin.

<sup>9</sup> Gebe mata huwak nin amanen nurdeb mata bulun ninbe bege ar yen hiyen.

Goke tenbe gere Al Kurun belen basina girde al denem yan wor po gire yen olip fimin ten tonanger wok iryin.

Irkeb goke amanen wor po nurarin.

Goyenbe kadge yago kurabe gwahade ma iryin,”  
yitin hi. *Tikin 45:6-7*

<sup>10</sup> Irdeb,

“Doyan Al Kurun, han karya wor po det kurun gayen forok yemin monde megen ga kerarin. Nan kin wor gigen irarin.

<sup>11</sup> Det megen nin ya nan kin de nin ya kurun gabe bulun henayin. Gega gebe huginen hayin.  
Det kurun gabe amil bida hen erek yenayin go gwahade goyen po, bulun henayin.

<sup>12</sup> Al kura ulin hormin bidak mupi yirde yemeyde han yen go gwahade goyen po, det kurun gayen kun kun bulun heke yemeyayin.

Irde amil gergen ten amil bidak gote gasunen de kerde han yen go gwahade goyen po,  
det kurun gayen wor bulun heke kame det gergen belen gasun min yawarnayin.

Goyenbe gebe gwahader hayen geb, gwahade po hayin,” yitin hi. *Tikin 102:25-27*

<sup>13</sup> Al Kurun be miyon min kura goke mere gahade mun kura ma iryin:

“Wan ketalner hen al denem yan wor po hawayin.

Irkeb asogo girde hañ mar goyen bul yirde yawan gasa yirmeke katkeb yufurka tiyayin,” yitin hi. *Tikin*

*110:1*

<sup>14</sup> Miyonmin gobe alya bereya Al Kurunyen dirnen wen henbe kame yenya hinayin mar goyen faran yurde hinayin yen yiryin.

## 2

### *Al Kurunyen mere kenkela bebak titek*

<sup>1</sup> Niñgeb neñbe saba fudinde nurde hinhet goyen kenkela wor po tanarde go po gama irde hitek. Monjo soñ heñ saba fudinde goyen tubul ten saba hoyan gama irtek geb. <sup>2</sup> Al Kurunyen saba miyonmin beñ basan heñ asininin yago yuntin gobe saba fudinde geb, al kura sabamin walkaka irde gama ma iramin marbe mata bulunmin gote murungem bulun yawartek goyen po yawamin. <sup>3</sup> Saba gobe bikkek gega, pel irde kanduk kenen hinhan. Niñgeb saba gergen Doyan Al Kuruninin Yesu beñ tagalyin gobe saba bikkek gote folek geb, saba gergen goyen pel irtekbe daha mat Al Kurunyen bearar goyen fole irtek? Epte mon. Niñgeb gago sabamin kenkela nurde gama irde hinayin dinen hime. Saba gergen gobe Al Kurun beñ mata bulunde mat dumulgan tiyen yen Doyan Al Kuruninin beñ yingen wa tagalyin. Irdeb sabamin yingen kirminde nuramin mar beñ basan heñ fudinde yen momon diramin. <sup>4</sup> Irde saba gergen gobe fudinde goyen alya bereya yikala yire yenbe Al Kurun beñ mata tinen turnun yan wor po

kurayen kurayen forok yirde hinhin. Irde alya bereyamin Holi Spirityen tarende mata ten ten goyen yunen yen nurde hinhin mar goyen yunen tukun hinhin.

*Yesube neŋ faran durd durd al wor po hirin*

<sup>5</sup> Be, neŋbe alya bereya belen Al Kurunya heŋ heŋ mata gergeŋ goyen goke mere ten hite gago. Al Kurunbe alya bereya yenya heŋ heŋ mata gergeŋ forok yiyyen goyen doyan irtek al kura basaŋa iryin. Goyenbe miyonmin gwahade kura ma basaŋa iryin. <sup>6</sup> Goke tenbe Al Kurunyen asaŋde kurar kurabe gahade katin hi:

“Megen nin marbe al denem minmon wor po.

Gega gebe yen ge nurdkakala wor po yirde hayen.

Megen nin alyen dirnen wen gabe al denem minmon.

Gega gebe kenkela doyan yirde hayen.

<sup>7</sup> Ge belen al yirdeb tareŋ manan yunarin.

Gega alyen sanjbe miyonger tareŋ gote bande heŋ irarin.

Gega mel goyenbe denen turun yan yunarin, irde al denem yan wor po yirarin.

<sup>8</sup> Irdeb det kurun gayen yen yufukde yerarin,” gwahade yitin. *Tikin 8:4-6*

Fuinde wor po, Al Kurun belen det kurun gayen alyen yufukde yirinyabe det mun kura ma tubul tiyyin. Tumnan yerde pasi iryin. Goyenbe hanke gabe det kurun gayen alyen yufukde ma hike yenen hityen. <sup>9</sup> Ningeb goke tenbe Yesu nin dufay heŋ hite. Yenbe nalu dolfonde po megen nin al hirin. Irde yen wor Al Kurunyen miyon gote tareŋ

bande tirin. Irde neŋ ge teŋ kanduk teŋbe kamiŋ geb, Al Kurun beŋ isan heŋbe teŋ deŋem turun yaŋ irde al deŋem yaŋ wor po irin. Fudinde, Al Kurun beŋ neŋ megen nin mar nin bunin narde iŋin iŋin dirin geb, gogo Yesu beŋ neŋ tumnan gake kamiŋ. <sup>10</sup> Al Kurunbe megenya nanŋin ya irde det kurun gate min al. Yeŋ beŋ po ga det tumnan kurun gayen yirde doyan yirde hi. Yeŋbe alya bereya budam dirin weŋ yirde sanin min turun yaŋ bana yukun yukun nin nuriŋ. Goke teŋbe Yesu teŋ kerke katiŋ. Niŋgeb gogo kanduk karkuwan karkuwan yiniŋ. Al Kurunbe gwaha mat Yesu goyen alya bereya mata bulun minde mat Al Kurun hitte yumulgan teŋ teŋ metin kenkela po titek al wor po irin. Al Kurun beŋ gwahade irin gobe huwak wor po.

<sup>11</sup> Yesube gwahade geb, yeŋ beŋ alya bereya mata bulun min halde wukken yirin maria yinŋenya goyen Naniŋbe unkuŋen po. Niŋgeb Yesu beŋ Al Kurun dirin weŋ hitin mar goyen dine yago yinŋen yinŋen nin memyak ma narde hiyen. <sup>12</sup> Yesu beŋ gwahade narde hiyen goke Al Kurun mere irin goyen asan minde gahade katin hi:

“Alya bereya gama nirde han mar, dine yago goyen ge nin momon yinŋen.

Mel go gabu irde hande gor kun dilin mar turun girde tikiŋ hewen,” yitiŋ hi. *Tikiŋ 22:22*

<sup>13</sup> Irdeb, “Nebe Al Kurun nin po hekken narde heŋ,” yiriŋ.

Irdeb sopte, “Nebe dirinŋe yago Al Kurun beŋ nuntiŋ goya gago tumnan hite,” yitiŋ hi.

*Aisaia 8:17-18*

<sup>14</sup> Goyenbe dirneñ weñ gobe al darim yañ geb, Yesu wor bere beleñ kawan kerke darim yañ hiriñ. Al hiriñ gobe yeñ beleñ uliñ misiñ kateñ kamkeb kamde kamde tareñ Satan beleñ tanarde hitiñ goyen hubu ireñ yeñbe gogo al hiriñ. <sup>15</sup> Gogab alya bereya kamde kamde niñ kafura heñ hugineñ kafura dufay gore bili yirde hike kandukneñ nurde hanyen mar gobe gwahade ma nurde hipirkeñ nurde hinayiñ.

<sup>16</sup> Fudinde, Yesube Al Kurunyen miyon ma farañ yuryiñ. Yeñ farañ yurtineñbe Abrahamyen foneñmiñ yago farañ yuryiñ. <sup>17</sup> Yeñbe gwahade goyen po tiyeñ yeñ nurde hinhin geb, yeñ wor neñ megen niñ al gahade hetek po hiriñ. Gogab yeñ beleñ Al Kurun dolon ird ird mata doyañ mar pris buda gote kurunmiñ heñ alya bereyat mata bulun halde yuneñ yuneñ niñ dapña gasa yirde galak irde hanyen yara yingeneñ uliñ pigineñ goyen Al Kurun galak irde kameñ yeñbe gogo al hiriñ. Yeñbe meteneñ go teñ heñyabe alya bereya niñ bunineñ nurde hinhin, irde Al Kurunyen mere keñkela po gama irde meteneñ teñ hinhin. <sup>18</sup> Yeñbe unğura beleñ lom irke gote kandukbe gwahade yeñ nurde hinhin geb, al kura unğura beleñ lom yiryen marbe igiñ yeñ beleñ farañ yuryen.

**3***Yesube Mose gote folek*

<sup>1</sup> Niñgeb, kadne yago, Al Kurun beleñ neñ hoy diriñ gwahade goyen deñ wor hoy dirtiñ geb, Al Kurun diliñde wukkeñ wor po. Niñgeb

dufaytinbe Yesu hende po irde hinayin. Yenbe Al Kurunyen mere basan al porofet, irde pris buda gote kurunmin fudinde wor po yen nurde tagalde hityen gogo. <sup>2</sup> Yenbe hakot Mose belen Al Kurunyen dirnen wen Israel mar binde mat wor po yen ge nurde kenkela doyan yirde hinhin gwahade goyen po, Yesu wor Al Kurun belen meten unyin goyen kenkela po tiyyin. <sup>3</sup> Goyenbe Yesu denem turun yan hetek gobe Mose denem turun yan hitin gote folek wor po. Gobe al kura ya irke ya goyen turun irtinenbe ya iryen al goyen turun irde hanyen go gwahade goyen. <sup>4</sup> Fudinde, yabe al belen yirde hanyen. Goyenpoga det kurun gabe Al Kurun belen yiryin. <sup>5</sup> Mosebe Al Kurunyen meten al henbe Al Kurun dirnen wen goyen binde mat wor po yen ge nurde kenkela faran yurde hinhin. Gwaha ten henyabe Al Kurun belen kame mere dahade tiyyen goyen goke tagalde hinhin. <sup>6</sup> Munan Yesu Kristube Al Kurun Urmin geb, Al Kurun dirnen wen goyen binde mat wor po yen ge nurde kenkela doyan yirde hiyen. Irdeb nenbe taren po hen Al Kurun belen kame gwaha diryen goke doyan hen hen goyen bada ma hetekbe yende dirnen wen wor po hetek.

*Al Kurun gama ird ird nin bada ma hetek*

<sup>7</sup> Ningeb Holi Spirit belen gaha yirin:

“Han ka gayen Al Kurunyen mere nurde han kenem <sup>8</sup> tonantin sanin ma irnayin, irdeb meremin nurde gama irde hinayin.

Hakot den Israel marte asetin yago sawsawa po kurun nan bana hin hanyabe



Al Kurun̄ tun̄an̄ urtek yeñ tonan̄ san̄in̄ irde meremin̄ pel irde hinhan.

<sup>9</sup> Bana goñ kun̄ hen̄yabe dama 40 gayen asetin̄ yagobe mata tin̄en̄ tur̄un̄ yan̄ wor po forok yirde hinhem goyen yenen̄ hinhan.

Gega tun̄an̄ nurde kurut nirde hinhan.

<sup>10</sup> Goke ten̄be yeñ ge bene ar yirin̄.

Irdeb, ‘Mel gabe hugin̄en̄ det hoyan̄ nin̄ nurde ne nin̄ ma nurde han̄.

Irdeb matane ma kenen̄ bebak ten̄ han̄,’ yimirin̄.

<sup>11</sup> Nin̄geb goke bene ar yekeb, ‘Mel gabe nere usan̄ heñ heñ gasun̄ yun̄mirin̄de gor epte ma wan̄ usan̄ heñ igin̄ hinayin̄,’ yeñ masi taren̄ po timirin̄,” gwaha yirin̄.

<sup>12</sup> Nin̄geb, kadne yago, bitin̄de Al Kurun̄ gwahader hitin̄ goyen harhoktin̄ untek dufay bulun̄ kerde yeñ ge dufaytin̄ taren̄ ird ird nin̄ manan̄ bada henak geb, ken̄kela po heñ hinnan̄ ko.

<sup>13</sup> Gwahade hitek yeñbe nan̄a nalu “Han̄ka” inen̄ hityen gayenter gabe den̄ tun̄an̄ san̄in̄ heñ heñ ge hugin̄en̄ kadom faran̄ gurd ten̄ hinayin̄. Gogab mata bulun̄ ten̄ ten̄ dufay gore epte ma bulun̄ dirke tonan̄tin̄ taren̄ henayin̄. <sup>14</sup> Irde mehen̄de

wor po Yesu Kristu nin̄ dufaynin̄in̄ taren̄ irtirin̄ goyen tubul ma ten̄ san̄in̄ po tanarde hitek. Kamde kamde nalu forok yiyyen̄ gega, taren̄ po tanarde hitek. Gwaha titekbe Yesu Kristuya gabu heñ Al Kurun̄yen meten̄ ten̄ gote igin̄en̄ igin̄ wor po goyen yen̄ya gale heñ yawartek. <sup>15</sup> Goke ten̄be Al Kurun̄yen asan̄de hayhay gahade dirtin̄:

“Han̄ka gayen Al Kurun̄yen mere nurde han̄ kenem

asetiñ yago beleş tiyamiñ gwahade goyen tonañtiñ tareñ ma irde meremiñ nurde hinayiñ,” yitiñ. *Tikiñ 95:7-8*

<sup>16</sup> Be, hakotbe ganuñ mar beleş Al Kurunyen mere nurde hinhan gega, pel irde hinhan? Gobe Mose beleş Isip nanjare mat yade nanja hoyande yukuriñ mar gore teñ hinhan. <sup>17</sup> Irdeb Al Kurunyen beleş dama 40 gayen ganuñ mar bearar yirde hinhin? Go mar gobe sawsawa po kurunyen nanja bana goñ henya mata buluñ teñ kamde erek namiñ mar goyen yirde hinhin. <sup>18</sup> Irdeb ganuñ mar hitte wor po Al Kurunyen beleş bearar hende biña teñbe, “Mel gobe epte ma nere usañ gasunde wañ usañ heñ igiñ henayiñ,” yiriñ? Mere gobe meremiñ ma gama irde hinhan mar goke yiriñ. <sup>19</sup> Niñgeb go mar gobe Al Kurunyen niñ dufaymiñ sañiñ ma irde hinhan geb, Al Kurunyen usañ gasunde hurkuñ hurkuñ niñ utañ yirke ma kwamiñ gobe nurde hityen gogo.

## 4

*Al Kurunyen alya bereyabe usañ heñ tareñ henayiñ*

<sup>1</sup> Niñgeb neñ wor kenkela heñ hitek. Al Kurunyen beleş usañ gasuñmiñ neñ ge tubul teñ biña tiyyiñ hi goyen neñ wor moñgo epte ma bana goñ hurkuniñ geb. <sup>2</sup> Hakot asetiñ yagobe neñ beleş Yesu niñ yitiñ mere igiñ goyen tagalke nurde hityen gwahade goyen po, Al Kurunyen mere nurde hinhan. Goyenbe meremiñ go nurde fudinde yeñ dufaymiñ tareñ ma yiramiñ geb, yeñ hittebe miñ miñmoñ iryiñ. <sup>3</sup> Niñgeb neñ dufayniniñ yeñ ge

sanjij irtij mar po ga yende usanj gasunje igij hurkutek. Al Kurunbe megenya nanjinya det kurun gayen yirdeb usanj gasun wor gitik irde ep iryij. Goyenbe yen ge dufayminj tarenj ma irtij mar goke Al Kurun belej asanjminjdeb, “Nebe bearar tenbe, ‘Mel gobe epte ma wor po usanj gasunjer hurkunayinj,’ yen binja tihim,” yirij.

<sup>4</sup> Munanj usanj henj henj gokeb Al Kurunyen asanj bana gonj kurar kurabe gahade katinj hi: “Al Kurunbe nanja fay 6 gayen metenj tenj pasi wor po irde nanja fayminj 7debe usanj hirij,” yitij hi.

<sup>5</sup> Goyenbe mereminj pel iraminj mar goke asanjminj bana mere hoyanj kurabe gahade hi: “Mel gobe epte ma nere usanj gasunje hurkunayinj,” yitij hi.

<sup>6</sup> Nijgeb gwahade goyen po, Al Kurunyen usanj gasunbe igij ala hurkunayinj yen gitik irde ep irtij hinjin gega, hakot Israel marbe Al Kurunyen mere goyen igij ma nurde pel iraminj geb, tumnanj ma usanj gasunjinje gor hurkaminj.

<sup>7</sup> Goyenbe nanja nalu “Hanja” inenj hanjyende nij alya bereya belej usanj gasunje hurkunayinj yen dufayminj kirtij goyen goke kamebe Dewit inyinj. Munanj nanja nalu “Hanja” inenj hanjyende nij alya bereya gobe gayenter nij alya bereya nij yitij. Al Kurun belej Dewit inyinj gobe asanjminje gahade katinj hi:

“Hanja gayen Al Kurunyen mere nurde hanj kenem tonantij tarenj ma irde mereminj nurde hinayinj,” yitij. *Tikij 95:7-8*

<sup>8</sup> Be, usanj gasunj nij yen hime gobe Kenan megenj Yosuwaja belej Israel mar yukurij goke ma yen hime. Mel gore Kenan megenje kunj

fudinde wor po usañ hamiñ manhan usañ gasuñ kuñ kuñ nalu hoyañ goke Al Kuruñ beleş Dewit momoñ ma irwoñ. <sup>9</sup> Niñgeb usañ nalu Sabat fudinde wor pobe Kenan nañare kuñ keperamiñ gogo moñ. Go nalu gobe Al Kuruyen alya bereyamiñ niñ teñ kame forok yetek hinhin. <sup>10</sup> Niñgeb Al Kuruñ beleş metenmiñ pasi irde usañ hiriñ gwahade goyen po, al kura Al Kuruyen usañ gasuñde hurkunayiñ marbe tumñañ usañ henayiñ. <sup>11</sup> Niñgeb neñ tumñañ usañ gasuñde gor hurkuñ hurkuñ niñbe teñniñ ilhal teñ kurut wor po yeñ hitek. Gogab Al Kuruyen mere pel irde hinhan mar gote mata ma gama irde hitek. Irdeb usañ gasuñmiñde hurkuñ hurkuñ niñ soñ ma hetek.

<sup>12</sup> Be, Al Kuruyen merebe mali mere yara moñ, tonneñ yañ wor po. Mere gobe fulenare niñ bidila kura misiñ kurhan kurhan yaltin gote misiñ folek wor po. Niñgeb kiñkiniñniñ yago yawañ tur yirtin teñniñ karkuwañ goyen bidila gore walde, kiñkiniñniñ paten nañgiram kawan irde hi gwahade goyen po, mere gobe dufayya mataya bininiñ biñde niñ wor po goyen yade kawan yirde hiyen. Irdeb dufayniñya mataniniñya igiñ ma buluñ goyen dikala dirde hiyen. <sup>13</sup> Det kura Al Kuruñ diliñde epte ma bana kunayiñ. Dawet Al Kuruñ beleş yiryiñ gobe diliñdebe kawan ala po hañ. Niñgeb mata teñ hityen kuruj goyen unkuñeñ muñ kura yeñ diliñde epte ma bana kertek. Huwardeb mata teñ hityen kuruj goyen tumñañ kawan po momoñ irtek.

<sup>14</sup> Goyenpoga Al Kuruñ Urmiñ Yesu, neñ ge

ten pris buda gote kurunmin hirin al gore Al Kurunyen gasunde gor hen faran durde hi. Ningeb yen ge dufayninin sanin irde goke tagalde hityen goyen tubul ma po titek. <sup>15</sup> Nende pris buda gote kurunmin megen gar hinhinyabe megen nin dufay bulun kurayen kurayen forok yen lomlom dirde hanyen gwahade po, yen wor lomlom irde hinhan. Goyenbe mata bulun mun kura ma tiyyin. Ningeb yenbe nen belen mata bulunde katen hityen belnenbe damin goyen kenkela nurde buninen dirde hi. <sup>16</sup> Ningeb nenbe Al Kurun belen gab buninen dirde igin igin diryen yen hekken nurdeb yen hitte kun kun nin kafura ma hen hitek. Irkeb yen belen buninen dirde hiyen. Gogab faran nin nurtekeb yen belen buninen nirde igin igin dirde faran durde hiyen.

## 5

<sup>1</sup> Be, pris buda gote kurunmin hen hanyen kurun gobe Al Kurun belen Israel mar nin ten pris buda bana gon nin al kura basina yirde hikeb yen ge meten ten hanyen. Meten gobe yen belen ga tonan hen Al Kurunyen ya balem bana hurkun Al Kurun hitte det galak irde, almet mata bulun halde halde nin dapna gasa yirde Al Kurun nin kumga ten hanyen. <sup>2</sup> Pris buda gote kurunmin wor megen nin al, mata bulunde igin kattedk ala po han geb, bulun tihit yen ma nurdeya mata bulun ten han mar goyen yen belen kwep kwep ma yirde bekennde mere yirtek po hinayin. <sup>3</sup> Goke tenbe al hoyande mata bulun halde halde nin po ma Al Kurun dapna kumga ten galak irde

hanyen. Yingenje mata buluj niŋ manan nurde gwaha tej hanyen.

<sup>4</sup> Be, al kura deŋne yaŋ hewe yeŋ epte ma pris buda gote kurunmin hiyyen. Yeŋbe Al Kurun belen Aron basaŋa iryin gwahade goyen po irke gab pris buda gote kurunmin hiyyen. <sup>5</sup> Niŋgeb Yesu Kristu wor yingen deŋne turnun yaŋ hewe yeŋ pris buda gote kurunmin ma hirin. Gwahade yarabe yeŋ ge amanen nurdeb, “Gebe Urne wor po haha. Irke hanƙabe nebe Adoge wor po hihim,” yirin al Al Kurun goreb pris buda gote kurunmin iryin. <sup>6</sup> Irdeb meremin kurar kurabe, “Gebe Melkisedeyen minde niŋ al henbe huginen pris hayin,” inyin.

<sup>7</sup> Be, Yesube gwahade geb, megen gar hinhinyabe alya bereya niŋ buninen nurde esen henya Al Kurun gusaŋa irde hinhin. Yeŋbe Al Kurun palap irde meremin gama irde hinhin geb, gusaŋamin goyen wol hirin. Al Kurunbe Yesu go kamde kamde mata fole irtek taren igin untek hinhin.

<sup>8</sup> Be, Yesube Al Kurun Urmin gega, kanduk kurayen kurayen yenen hinhinde gor matbe Naniŋde mere nurde gama ird ird matabe gwahade yeŋ bebak tiyyin. <sup>9</sup> Gwaha matbe Naniŋde mere gama ird ird mata goyen kura muŋ soŋ ma hirin. Kenkela wor po gama iryin. Niŋgeb alya bereya meremin gama irde han mar goyen tumŋaŋ yumulgaŋ tike Al Kurunya huginen hinayin gote min al hirin. <sup>10</sup> Irkeb Al Kurun belen Melkisedeyen minde niŋ al irdeb pris buda gote kurunmin iryin.

### *Dufaytinbe dirin kalak yara ma henayin*

<sup>11</sup> Be, Yesu belen Melkisedekyen minde nin al hen pris buda gote kurunmin hirin goke momon dirtek mere gobe budam po han. Goyenbe denbe aran ma bebak ten han geb, mere dird dird gobe metenen wor po.

<sup>12</sup> Denbe Yesu nin dufaytin taren iramin, irde dama ulyande kutin geb, gaha nanabe al hoyan saba yird yird mar hewon. Goyenbe Al Kurunyen mere tinenya nuramin go gwahade po, al belen po ga saba dirtek han. Ningeb denbe dirin kalak mamu po nene binde sanin ma nene hanen go gwahade yara han. <sup>13</sup> Al gwahade kura saba tinenya nuramin goyen po nurde han marbe dirin besare nin mamu po nene han go gwahade goyen. Ningeb mata daminbe Al Kurun dilingde huwak goyen kenkela ma bebak ten hanen. <sup>14</sup> Munan Al Kurun nin heken nurde taren po han mar gote sababe al parguwakyan binde taren go gwahade goyen. Ningeb al gwahade gobe saba goyen nurde gama irde gab mata iginya bulunya kenkela yenen bebak ten mata igin ten nin po kurut yen hanen.

## 6

<sup>1</sup> Ningeb mehende wor po den tinenya Yesu Kristu nin saba dirke nuramin goyenter po sopte mulgan hen teban ma ten hitek. Gobe bada po hen Yesu gama ird ird matare parguwak hen hen saba goke po nurtek. Munan saba tinenya nurtirin goyenter po mulgan hetekbe ya irnin yen tola yimiyinde po henbe ya pasi ma irtek go gwahade goyen. Ningeb Al Kurun tubul ten gisaw

kutek mata bulun goyen yubul tenj Al Kurun nin bitinj mulgan hej hej mataya Al Kurun nin dufayninin saninj ird ird mataya gote sabare po ma hitek. <sup>2</sup> Irde baptais tenj tenj mata, al hende hanninin yerde Al Kurun gusunanj ird ird mata, al kamtinj kame huward huward gote sabayabe nalu funande al tumnanj merere huwarnayinj gote sababe Yesuyen alya bereya gayamun ga gergen hanj mar gote saba geb, saba goyenter po ma hitek. <sup>3</sup> Al Kurun belen iginj yenj nurdeb faranj durkeb dirinde saba go yubul tenjbe tarenj dird dird saba goyenter kutek.

<sup>4-6</sup> Munanj al kura Al Kurun belen dufayminj wuk irtinj gega, Al Kurun harhok unyenj al gobe Al Kurun Urminj goyen pel irde al hoyanj dilinj mar sukal irde sopte kuruse hende mayke kamyenj go gwahade goyen. Nijgeb al gwahade gobe kame epte ma mata bulun go tubul tenj Al Kurun hitte binj mulgan hiyyenj. Nijgeb al kura Al Kurunyen tarenj titinj, irde Holi Spirityen saninde mata tenj tenj mananj nurtinj, irdeb Al Kurunyen merebe iginj yenj binde mat kenkela bebak titinj, irde Al Kurun belen alya bereyaminj doyanj ird ird gote tarenj kame wayyenj go wor bikkenj kintinj al gore Al Kurun harhok unyenjbe epte ma mata bulun go tubul tenj binj mulgan hiyyenj. <sup>7</sup> Nijgeb megenj kura kigarinj katenj bida irke binje iginj wor po forok yeke metenj minj al belen yawaryenj go gwahade goyen po, al kura Al Kurun belen det iginj untinj gote iginenj iginj wor po forok yirke al gobe guram irde tarenj iryenj. <sup>8</sup> Munanj megenj gobe yamunya det hirwanenj yanj po forok yiryenbe megenj iginj



mon geb, megen gote miñ al belen karan urde yasun ma tiyyen gwahade goyen po, al gwahade goyen wor Al Kurun belen bulun iryen.

<sup>9</sup> Be, kadninin yago, gwaha mat hayhay dirde hite gabe den goyen mata goyenter ma kunayin yen nurde henya ga dinen hite. Denbe Al Kurun belen dumulgan titin han geb, kamebe huginen dawartek belen po han. <sup>10</sup> Fudinde, Al Kurunbe al kura po igin yirde kurabe bulun yirde ma yirde hiyen. Yenbe den belen yen ge meten kurun po ten han goke bin sir ma yen hiyen. Irde yen ge amanen nurdeb alya bereyamin faran yurd yurd nin bada ma hen faran po yurde han goke wor bin sir ma yen hiyen. <sup>11</sup> Ningeb den kurun goyen kame Al Kurunyen det igin yawartek yen doyan hen han goyen fudinde yawartek yen megen gar henya kadtin faran yurd yurd nin huginen kurut yen hinayin yen nurde hite. <sup>12</sup> Irde asetin yago kura belen mata ten hinhan goyen den wor gwahade po ten hiwon yen nurde hite. Mel gobe Al Kurun belen kame detmin dunen yen bin titin goke heken nurde tetewon po yen doyan hen hen nin pinen ma hen hinhan. Ningeb den wor gwaha ten ten nin pinen ma hen hinayin.

*Al Kurun belen bin tiyyin goke heken nurtek*

<sup>13</sup> Be, asetin kura mata gwaha tiyyin albe Abraham. Al Kurun belen Abraham hitte bin tiyyinyabe al kura yen folek kura hike den urde bin titek mon geb, yingen den urde bin tiyyin. <sup>14</sup> Bin tenyabe, “Fudinde wor po guram girde sanin giren. Ningeb fonenge yago budam forok yen hinayin,” inyin. <sup>15</sup> Irkeb Abraham go mere

gote iginej niñ doyañ heñ heñ ge piñeñ ma heñ doyañ po heñ hinhin. Irdeb kuñ kuñ kame gabe Al Kurun belen inyin gwahade po forok yirin.

<sup>16</sup> Be, albe kandukmin kura pasi irnin yenbe al hoyañ kura yen folek goyen deñe urde biña teñ hanjen. Irkeb kanduk goke kadom mohonde teñ hinayin gobe gogo po hubu hiyyen. <sup>17</sup> Niñgeb Al Kurun wor yinjen deñe urde biña teñ hinhin. Gogab Al Kurun belen yen ge teñ biña tiyyin mar gore Al Kurunbe dufaymin hoyañ ma irde hiyen goyen yen belen nurwon yenbe gogo yinjen deñe urde biña teñ hinhin.

<sup>18</sup> Niñgeb biña kura taren po ire yenbe yinjen deñe urde teñ hiyen. Biña teñ teñ mata irawa Al Kurun belen titin gobe usi moñ geb, sorkok ma hiyyen. Niñgeb Al Kurun belen detmin igin dunyen yen nurde goke doyañ hiniñ yen mata bulunde mat busaharde Al Kurun hitte watin mar neñ gayenbe biña tiyyin gore farañ durde taren diryen.

<sup>19</sup> Niñgeb Al Kurun belen gwaha direñ yen biña tiyyin goke heken nurde doyañ heñ heñ gobe anga temeyke hakwa tanarke unjurende po hiyen go gwahade, heñ heñninin wor sanin po hiteke det kura belen bulun dirtek ma hite. Al Kurun belen gwahade diryen gobe Yesu hitte mat gwaha diryen yen nurde nenbe Yesu niñ po nurde hite. Yen belenbe Al Kurunyen ya balem bana gasun himam wor po amil tolok gore po pet titin goyen fole irde Al Kurun diliñ mar hurkurin. <sup>20</sup> Yenbe neñ ge teñ bikken bana goñ yen wa hurkurin. Irdeb Melkisedekyen minde niñ al

henbe pris buda gote kurunmin hen huginen meten ten hi.

## 7

### *Pris buda gote kurunmin Melkisedek*

<sup>1</sup> Be, Melkisedek gobe Salem taun kurun goyenter nin doyan al kurun. Irdeb yenbe Al Kurun taremin hende wor po goyen dolon ird ird mata doyan al. Yenbe hakot Abraham belen fulenare kun nana hoyande nin doyan mar karkuwan gasa yirke busaharkeb detmin yade mulgan hen wakeb guram irde tarej iryin. <sup>2</sup> Irkeb Abraham belen fulenare kun dawet yawaryin kurun goyen pota yirde buda 10 yirdeb buda unkurenbe yen unyin. Deje Melkisedek gote minbe “Mata huwak ten ten doyan al kurun.” Munan denem kura “Salem nin doyan al kurun” gote minbe “Al bin yisikamde kamdere nin doyan al kurun.”

<sup>3</sup> Al gote milinya naninyabe gogo yen ma po nurde hite. Irde asem yago min gwaha mat kura watin, irde kawan hirin naluya kamyin naluya wor bebakken mon. Yenbe Al Kurun Urmin yara, huginen Al Kurun dolon ird ird mata doyan al hitin.

<sup>4</sup> Ningeb al gobe al dahade wor po yen dufay henayin. Yenbe al denem turnun yan wor po geb, asetin Abraham den belen denem yan inen hanyen gore wor fulenare kun dawet yawaryin goyen yawan pota irde buda 10 yirde buda unkurenbe yen unyin. <sup>5</sup> Gayenterbe Moseyen sabare yitin gwahade po al dawetmin yadeb buda 10 yirdeb buda unkurenbe Liwai minde

niŋ mar pris hitiŋ goyen yunen hanŋyen. Liwai marbe Israel mar bana goŋ niŋ po gega, Israel mar bana goŋ hoyanbe Moseyen sabare yitiŋ goyen po gama irde detmiŋ goyen buda 10 yirde buda unjkurenbe yeŋ yunen hanŋyen. <sup>6</sup> Goyenpoga Melkisedekbe Liwai miŋde niŋ al moŋ gega, Abraham beleiŋ detmiŋ buda 10 yirde buda unjkurenbe unyiŋ. Irkeb Al Kurun beleiŋ yeŋ hitte biŋa tiyyiŋ al Abraham goyen Melkisedek beleiŋ guram irde saŋiŋ iryiŋ. <sup>7</sup> Niŋgeb al kura tareŋ miŋyan beleiŋbe al hoyan tareŋmiŋ bande goyen guram yirde saŋiŋ yirde hanŋyen gobe nurde han gogo.

<sup>8</sup> Liwai mar pris hitiŋ gobe al po geb kamnayiŋ gega, Israel mar beleiŋ detmiŋ pota irde buda unjkuren yunen hanŋyen. Goyenpoga Al Kurunyen asaŋde Melkisedekbe kamiŋ moŋ yitiŋ al goyen Abraham beleiŋ detmiŋ pota irde buda unjkuren unyiŋ. Niŋgeb Melkisedekbe Liwai mar pris hitiŋ gote folek. <sup>9-10</sup> Irde hakotbe Liwai mar ma forok yekeya Melkisedek beleiŋ Liwai mar gote asem Abraham kinyiŋ. Goya goyenbe Abraham beleiŋ detmiŋ buda 10 yirde buda unjkurenbe Melkisedek unyiŋ. Niŋgeb Abraham beleiŋ go tiyyiŋ gobe asem weŋ Liwai mar beleiŋ Melkisedek untiŋ yara hiriŋ.

<sup>11</sup> Be, bikkeŋ Israel marbe Moseyen saba tamiŋ. Irde Moseyen sabarebe Liwai mar beleiŋ pris meten ten hinayiŋ yitiŋ. Goyenbe go meten ten hinhan gore alya bereyat mata bulun halde pasi ma irde hinhan. Halde pasi irde hinhan manhan Al Kurun beleiŋ Liwai marte fonen kura Aronyen miŋde niŋ al po meten goyen unwoŋ. Gega

gwahade moŋ geb, al miŋ hoyan Melkisedekyen miŋde niŋ al gore waŋ pris meten tiyyen yeŋ nurde hinhin.

<sup>12-14</sup> Be, pris hoyan wayyen goke yeŋ hityen al gobe Liwai mar al moŋ. Al gote miŋde niŋ marbe Al Kurunyen ya balem bana altare heŋ Al Kurun doloŋ ird ird mata go ma ten hanyen. Gobe Doyan Al Kurunninibe Yudayen miŋde mat wayyin goke yeŋ hime. Gega Mosebe pris metenbe Yudayen miŋde niŋ al beŋ ten hinayin yeŋ ma tagalde hinhin. Goyenbe Liwai mar al moŋ Yesu gore waŋ pris meten goyen tekeb Moseyen saba bikkek gote gasuŋ manan saba gergen beŋ tirin.

*Pris gergenbe pris bikkek gote folek*

<sup>15</sup> Be, saba gergen gore Moseyen saba bikkek gote gasuŋ ten ten gote miŋbe pris hoyan kura Melkisedek yara gore forok yekeb kenkela wor po kawan forok yirin. <sup>16</sup> Al gore pris hirin gobe Israel marte asemde saba bikkek bana goŋ yitin go ma gama iryin. Gwaha irtinenbe huginen heŋ heŋ gote tarende pris hirin. Huginen heŋ heŋ gobe epte ma det kura beŋ buluŋ irtek hi. <sup>17</sup> Ningeb pris hirin al goke tenbe Al Kurunyen asande gahade katin hi:

“Gebe Melkisedekyen miŋde niŋ al heŋ huginen pris hayin,” yitin. *Tikin 110:4*

<sup>18</sup> Ningeb gwahade goyen po, saba bikkek gore gwaha gwaha tinayin yitin gobe taren minmon, irde gore faran durtek epte moŋ geb, Al Kurun beŋ saba bikkek goyen ten sinak beŋ kiryin.

<sup>19</sup> Fudinde, Moseyen saba goreb epte ma det kura

Al Kurun diliñde wukkeek iryen. Niñgeb Al Kurun belen saba gergen igin wor po, Moseyen saba bikkek gote folek goyen dunyin. Niñgeb nenbe saba gergen goyen gama irde Al Kurun bindere igin kutek.

<sup>20</sup> Yesu Kristu pris meten unyin gobe bikken Al Kurun belen yingen denge urde biña tiyyin go po gama irde pris iryin. Goyenbe pris hoyan gokeb biña kura ma tiyyin. <sup>21</sup> Yesu belen pris hirin goke mun po Al Kurun belen asanminde gaha yirin:

“Doyan Al Kurun belen biña tenbe, ‘Gebe huginen pris hayin,’ inyin.

Irdeb meremin goyen tubul ma tiyyen,” yirin.  
*Tikin 110:4*

<sup>22</sup> Niñgeb Al Kurun belen yingen denge urde biña tiyyin goke tenbe Yesu goyen Al Kurun belen alya bereyamin hitte biña gergen tiyyin gote iginen fudinde wor po forok irtek al iryin. Al Kurun belen biña gergen tiyyin gobe biña bikkek gote folek wor po.

<sup>23</sup> Be, Liwai marbe pris meten go ten hinhan gega, yenbe al geb kamde kun hinhan. Irkeb Liwai mar hoyan belen meten goyen ten hinhan.

<sup>24</sup> Gega Yesube gwahader hiyen al geb, pris meten tiyyin gobe gwahader po ten hiyen. <sup>25</sup> Yesube gwahade geb, Al Kurunya huginen haryen. Irde alya bereya faran yuri yen gusunan irde hiyen, irdeb kame wor gwahade po ten hiyen. Niñgeb yen belen Al Kurun hitte kun kun belen kerd yunke yen hitte kun han mar goyen tumnan yade hiyen.

<sup>26</sup> Yesu gobe Al Kurun dilinde wukken wor po ulinde merem mon, irde mata bulun minmon. Al Kurun belen yenya mata bulun maryabe hoyan mun wor po iryin. Irdeb Al Kurun hire gorbe denem yan kurun wor po iryin. Ningeb nenbe pris buda gote kurunmin gwahade gore faran durwon yen nurde hite.

<sup>27</sup> Liwai mar pris meten ten han mar gote karkuwanmin gobe yingen de mata bulun nin wa gise han ka Al Kurun galak irnin yen dapna gasa yirde kunga ten han yen. Gwaha ten gab al hoyande mata bulun nin wor gwaha po ten han yen. Goyenbe Yesube alya bereya megen han kurun gote mata bulun nin ten yingen Al Kurun galak irhem yen wawun un kuren gogo po kuruse hende kanyin. Irde sopte gwaha ma tiyyen.

<sup>28</sup> Be, Moseyen saba gama irde pris buda gote karkuwanmin hen han yen mar gobe mata bulun minyan. Goyenpoga Al Kurun belen yingen den urde bin tiyyin goyen gama irde pris hirin al Al Kurun Urmin gobe kenkela wor po pris meten goyen ten pasi iryin.

## 8

### *Yesube pris buda gote kurunmin*

<sup>1</sup> Be, mere gwahade ten hite gote min wor pobe gahade: nenbe pris buda gote kurunmin goyenninin yan hite. Yenbe Al Kurun saninmin hende wor po hitte hurkurin, irde Doyan Al Kurun hen ketalmin de hi. <sup>2</sup> Irde gorbe gasun himamde hurkun Al Kurun dolon ird ird mata doyan irde hi. Gor nin gasun himam fudinde wor

po gobe Doyan Al Kurun belen po ga irtin, megen gar nin mar belen ma irtin.

<sup>3</sup> Be, megen nin pris buda gote karkuwanminbe Al Kurun det galak irde dapna gasa yirde kumga ten dolon ird ird meten nin basina yirde meten goyen yunen hanjen. Ningeb nende pris buda gote kurunmin Yesu wor det kura Al Kurun galak irtrek go minyan po hiyen. <sup>4</sup> Munan megen garbe pris belen Moseyen sabare yitin go po gama irde det Al Kurun galak irde hanjen. Ningeb Yesu gobe megen gar hi manhan pris ma hewon.

<sup>5</sup> Goyenbe megen gar nin prisbe Al Kurunyen ya balem megen hi bana gon hurkunbe Al Kurun dolon irde hanjen. Ya balem megen hi gobe ya balem fudinde wor po Al Kurunyen gasunde hi gote tunanen po. Ningeb Mose belen Al Kurun dolon ird ird nin sel ya iren tike Al Kurun belen, “Dugure gor geya henbe ya balem gikala girmin goyen kenkela po nurdeb go po gama irde sel ya goyen irayin,” inen bebak iryin. <sup>6</sup> Goyenpoga Yesube meten igin hoyan wor po goyen tirin. Metenminbe megen nin pris belen saba bikkek gama irde meten ten hanjen gote folek wor po. Yesube alya bereyamin ge ten Al Kurun hitte kunbe Al Kurun belen bin gergen titin goyen taren po irde gote iginen forok irde hi. Al Kurun belen bin gergen titin gote iginenbe kurun, munan bin titin bikkek gote iginenbe kurun mon. Ningeb Yesuyen metenbe gogo megen nin prisyen meten folek wor po.

<sup>7</sup> Be, Al Kurun belen hakot bin tiyyin goyen kenkelak wor po manhan sopte bin gergen ma



tiwoŋ.

<sup>8</sup> Gega biŋa tiyyiŋ bikkek goyen al beleŋ keŋkela ma gama irde hikeb Al Kurun beleŋ yeneŋbe gaha yiriŋ:

“Doyaŋ Al Kurun beleŋ gaha yiriŋ:

‘Nurnaŋ ko! Nalu kura forok yiyyeŋ.

Goya goyenbe Israel marya Yuda marya hitte biŋa gergeŋ tiyeŋ.

<sup>9</sup> Biŋa gergeŋ tiyeŋ gobe bikkeŋ asem yago Isip naŋare mat yukun hinhem goyenter yeŋ hitte biŋa timiriŋ go gwahade moŋ.

Go mar gobe biŋa teŋya yinmiriŋ goyen ma gama irde hinhan geb,

ne wor yeneŋ wasak teŋ harhokne yunmiriŋ, gwaha yiriŋ.

<sup>10</sup> Irde Doyaŋ Al Kurun beleŋ sopte yiriŋ.

‘Kame kurabe Israel mar hitte biŋa teŋbe gaha yireŋ:

Dufaymiŋde sabane kerde biŋde kayeŋ.

Irdeb nebe yende Al Kurun heweŋ, irke yeŋbe nere alya bereya henayiŋ.

<sup>11</sup> Irdeb al deŋem yaŋya deŋem moŋya goyen tumŋaŋ ne niŋ nurde hinayiŋ.

Niŋgeb kadomya tayŋeŋ yagoya kura goyen Doyaŋ Al Kurun nurd unnaŋ yeŋ saba yirtek ma hinayiŋ.

<sup>12</sup> Nebe mata bulunmiŋ halde yuneŋ.

Irdeb sopte mata bulunmiŋ ge ma po nureŋ,  
“gwaha yiriŋ.” *Yeremaia 31:31-34*

<sup>13</sup> Be, Al Kurun beleŋ mere gwahade kurun tiyyiŋ gobe “biŋa gergeŋ” inyiŋ. Irkeb hakot biŋa

tiyyiñ gobe buluñ hiriñ. Niñgeb biña bikkek gobe heñ ga moñ bana kuyen.

## 9

### *Biña bikkekde niñ mata*

<sup>1</sup> Be, Al Kurun beñ hakot Israel marte asem yagot diliñde biña kurun tiyyiñ go banabe Al Kurun doloñ ird ird mata niñ yitiñ. Irde Al Kurunyen ya balem al beñ irtiñ goke manañ yitiñ. <sup>2</sup> Al Kurunyen ya balem gobe sel po irtiñ. Ya bana goñ gasuñ kurhan meheñ beñbe hushi go hende yerde yusuñ yurde hanñen kutumya altaya kura gor hinaryum. Irkeb gise hanñka alta go hende beret yerde hinhan. Det go hinhan gasuñ gobe “Gasuñ Himam” iney hanñen. <sup>3</sup> Irde gasuñ go harhokdebe “Gasuñ Himam Wor Po,” iney hanñen goyen hinhin. Gasuñ iraw go kahaltebe amil tolok wor po gore gasuñ iraw goyen kahalte giñ yitiñ hinhin. <sup>4</sup> Gasuñ Himam Wor Po bana goñbe det gahade hinhan: det hamiñ kusamuñ Al Kurun niñ kumga teñ uney uney gasuñ alta gol hora beñ po irtiñyabe Biña Teñ Teñ Bokisya.\* Bokis go wor gol hora parwek halgayiñ wor po irde gore po aw urtiñ goyen hinhin. Bokis go biñ banabe hora beñ kuwe dirñen irtiñ go biñdebe biñge kura “mana” iney hanñen goyen goñ hinhin. Irde Aronyen genuñ sopte ituñ hitiñ goyabe hora parwek irawaya Al Kurun beñ

---

\* **9:4:** Gol alta det hamiñ minñan kumga teñ teñ gasuñ gobe amil Gasuñ Himam Wor Po bana hurkun hurkun bindere wor po hinhin geb, gobe Gasuñ Himam Wor Po binde hi yen nurde hinhan.

sabamiŋ kaŋ Mose unyiŋ goyen Bokis biŋde goŋ hinhan.

<sup>5</sup> Al Kurunyen miyoŋ deŋem Serubim yinen hanyen gote toneŋ irawabe Bokis gote awmiŋ hende heŋ tapeŋ yisaŋ hitiŋ hinaryum. Serubim gobe Al Kurun deŋem turunŋ yaŋ wor po goyen kawan ird ird miyoŋmiŋ. Goyenbe haŋkab det kurunŋ goke keŋkela ma momoŋ direŋ.

<sup>6</sup> Be, ya bana goŋ niŋ dawet kurunŋ gob gwahade po gasuŋeŋyaŋ yirtiŋ hikeb pris beleŋ gasuŋ himam meheŋde niŋ bana goŋ gise haŋka hurkuŋ Al Kurunŋ doloŋ ird ird mata teŋ hinhan. <sup>7</sup> Gega damam damam wawuŋ unkuŋeŋde po pris buda gote kurunmiŋ po ga gasuŋ himam wor po bana goŋ hurkuŋ hinhin. Goyenbe mali mali ma hurkuŋ hinhin. Yiŋgeŋde mata bulunya al hoyan beleŋ ma nurde heŋya mata buluŋ titiŋ goyen halde yunwoŋ yeŋ dapŋa dari goyen teŋ gasuŋ himam wor po biŋde goŋ hurkuŋ hinhin.

<sup>8</sup> Pris beleŋ gwaha teŋ hinhan gobe gasuŋ himam meheŋde niŋ goyen miŋmoŋ manhan Gasuŋ Himam Wor Pore hurkuŋ hurkuŋ beleŋ kawan forok yewoŋ yeŋ Holi Spirit beleŋ dikala dirde hi. <sup>9</sup> Gasuŋ himam meheŋde niŋ gobe gayenter niŋ mata gote tuŋaŋeŋ. Pris beleŋ Al Kurunŋ doloŋ ird ird mata gama irde det galak irde dapŋa gasa yirde kunga teŋ hinhan gega, mata teŋ hinhan kurunŋ gore mel gote biŋ goyen Al Kurunŋ diliŋde wukkeŋ ma yirde hinhin. <sup>10</sup> Al Kurunŋ doloŋ ird ird mata bikkek gwaha teŋ hinhan marbe biŋgeya dapŋaya irde feya damiŋbe igiŋ netek munaŋ damiŋbe epte ma netek gote saba gama irde hinhan. Irde yiŋgeŋ uliŋ sope

yird yird mata kurayen kurayen po ten hinhan. Al Kurun belen nalu kiryin goyen ma forok yen hikeyabe mata goyen po ten hinhan. Gega mata gobe bin wuk irde irde nin mon, ulin sope irde irde nin po ten hinhan.

*Yesu Kristuyen dari*

<sup>11</sup> Goyenbe Yesu Kristube mata ingin bikken forok yitin gar han gote pris buda gote kurunmin hen wayyin. Irdeb gasun himam fudinde wor po wukke al belen ma irtin bana gon hurkurin. Gasun himam gote tarenminbe hoyan, megen hi gwahade mon, gote folek wor po. Gasun himam gobe megen gar ma hi. <sup>12</sup> Be, yenbe nen ge ten Al Kurun hiyende gor gasun himam goyen bana hurkurin. Goyenbe wawun unkurende po hurkurin. Irde hurke yenna memeya bulmakaw dirnenyat dari ma yade hurkurin. Gwahade yarabe dumulgan ten huginen Al Kurunen alya bereya dire yen darim wok irde kuruse hende kamyin. Ningeb mata gwahade tiyyin goke Gasun Himam Wor Po bana darim ten hurkurin yihim gago.

<sup>13</sup> Munan Al Kurun belen alien mata bulun halde yunwon yenbe pris belen memeya bulmakawyat dariya, irde bulmakaw bere fonen kunga tike wor yitin tupimin goyen yade al heren yutirin ten hinhan. Irke goreb ulinde wukke yirde hinhin. <sup>14</sup> Gega Yesu Kristuyen daribe dapna dari gote folek. Yenbe mata bulun mun kuram mon. Ningeb Holi Spirit huginen hitin gote sanindebe yingen Al Kurun galak irhem yen kamyin. Ningeb darimin gore ulninin sinare ga

po ma wuk iryinj. Ulnininya binininya goyen tumnañ halde wuk diryinj. Gwahade ningeb Al Kurun tubul ten gisaw kutek mata bulunbe yubul po titek. Gogab Al Kurun gwahader hitinj go po gama irde yen ge po meten ten hitek. <sup>15</sup> Goke tenbe Yesu Kristube alya bereyaminj ge ten Al Kurun hitte kun Al Kurun belen binja gergen titinj goyen tarenj irde gote iginenj forok ird ird al hirinj. Yenbe alya bereya Al Kurun belen hanƙapya binja tiyyinj goyen bana hen mata bulun ten hinhan goyen halde yunhem yen kamyinj. Gwahade geb alya bereya Al Kurun belen basinja yirde hoy yiryinj marbe Al Kurun belen yunenj yen binja tiyyinj detminj goyen yunyenj. Irkeb Al Kurunya huginjen hinayinj.

<sup>16-17</sup> Be, al kura kamenj yen nurdeyab dirinjminjin hitte kammeke gab gwaha gwaha tinayinj yinyenj. Goyenbe mere tiyyenj gobe kamke po gab dirnenj wen belen mere go gama irnayinj. Ningeb al kura kamenj yeny a mere titinj gobe al go kamke gab mereminj goyen pel ma irde yen yiyyenj go po gama irnayinj. <sup>18</sup> Gwahade goyen po bikkenj Al Kurun belen binja tiyyinj goyen Israel mar belen gama irnayinj yenbe al kamtinenbe Mose belen dapna gasa yirke kamaminj gogo. <sup>19</sup> Irdeb mehenje wor po Mose belen asande Al Kurunyen saba katinj kurun goyen al buda goyen kapyanj hen yunyinj. Irde gab bulmakaw fonenya memeyat dari yade feya suluk yiryinj. Irdeb sipsip wuynenj bukkenj irtinj goya hisop he haninj yuwalnenj minyanj goyen yadeb dariya feya suluk irtinj bana gonj ulinj

yiryiñ. Irdeb Al Kurunyen mere katiñ asañ go hende utiriñ teñ alya bereya uliñde wor gwaha po yirde tukuriñ. <sup>20</sup> Dari go utiriñ teñ yuney henyabe, “Gabe saba deñ beleñ gama irnayiñ yeñ Al Kurun beleñ biña tiyyiñ goyen tareñ ird ird dari geb,” yinyiñ. <sup>21</sup> Irdeb yiryiñ gwahade po, ya balemya ya bana goñ Al Kurun doloñ ird irdde niñ dawetya goyen hereñ wor utiriñ teñ tukuriñ. <sup>22</sup> Moseyen sabareb det kura Al Kurun diliñde wukken irtekbe dari beleñ po gab wukken iryen yitiñ. Gwaha irtek detbe budam wor po. Niñgeb dapña mayke dari wok yeke wor wor gab Al Kurun beleñ alya bereyat mata buluñ halde yuney yitiñ.

*Yesu beleñ mata buluñniniñ halde duniñ yeñ darim wok irde kamiñ*

<sup>23</sup> Be, megen gar niñ ya balemya det bana goñ niñya kurun gobe Al Kurunyen gasunde gor niñ tunañeñ po. Niñgeb dapña dari gore gab igiñ halde wuk yiryen gega, Al Kurunyen gasunde niñ ya balemya det bana goñ niñyabe dapña dari gore epte ma halde wuk yiryen. Dari kura dapña dari gote folek wor po gore gab epte halde wuk yiryen. <sup>24</sup> Niñgeb Yesu Kristu beleñ darimiñ wok irde kamiñ. Yenbe gasuñ himam fudinde wor po gote tunañeñ megen gar hi al beleñ irtiñ bana goñ ma hurkuriñ. Gwahade yarabe Al Kurun hitte hurkuriñ. Niñgeb hanka gayenbe neñ farañ durd durd niñ teñbe Al Kurun diliñ mar hi. <sup>25</sup> Munañ megen niñ pris buda gote kurunminbe yingenñde dari moñ, dapña dari goyen yade damam damam gasuñ himam bana hurkuñ hiyen. Goyenbe Yesu

Kristube yingen galak irde wawuñ budam ma kamyiñ. <sup>26</sup> Wawuñ unñkuren kamde alyen mata buluñ halde pasi ma iryiñ manhan Al Kurun beñ al yiryiñde mat mata buluñ halde halde niñ teñ megen gar wawuñ budam forok yeñbe uliñ misiñ kateñ kamde tebañ teñ hiwoñ. Goyenbe gwaha ma tiyyiñ. Gwaha titñeñbe mata buluñ halde pasi ird ird niñ Al Kurun hitte yingen galak irde kameñ yeñ nalu funañ beñ heñ hi gayenter megen gar wawuñ unñkuren po forok yiriñ.

<sup>27</sup> Albe wawuñ unñkuren po kamnayiñ, sopte ma kamnayiñ. Goyenbe go kamereb merere huwarke Al Kurun beñ al igiñ ma buluñ goyen pota yiryen. <sup>28</sup> Niñgeb gwahade po Yesu Kristu manañ al budam gote mata buluñ yad siña yire yeñ wawuñ unñkuren yingen Al Kurun galak irde kamyiñ. Irdeb kame sopte wayyen. Goyenbe goyenterbe alyen mata buluñ halde halde niñ ma wayyen. Gwaha titñeñbe yeñ ge doyañ heñ hañ mar yumulgañ teñ teñ niñ wayyen.

## 10

*Saba bikkek gama irde Al Kurun galak irtek gobe miñ miñmon*

<sup>1</sup> Be, Moseyen sababe det igiñ kura kame wanayiñ gote toneñ po, det fudinde Al Kurun hitte hañ goyen mon. Niñgeb sabamiñ gama irde damam damam dapña gasa yirde Al Kurun doloñ ird ird mata goyen po teñ tebañ teñ hinayiñ gega, mata goreb Al Kurun doloñ irniñ yeñbe yeñ hitte wañ hañ mar goyen epte ma mata buluñmiñ halde pasi iryen. <sup>2</sup> Gwahade mon

kenem saba bikkek gama irde Al Kurun galak irde han mar gobe goyare po huginon mata bulun minmon wukken hitin geb, mata bulun tihit yen matamin goke kanduknen ma nurwon. Irdeb saba bikkek gama irde Al Kurun galak ird ird mata goyen bada hewon. <sup>3-4</sup> Gega bulmakawya memeyat dari beles alyen mata bulun epte ma halde yuntek. Ningeb dapna gasa yirde darim goyen ten al heren utirin ten hanyen gobe mata bulunmin bebak yird yird meten po ten hi.

<sup>5</sup> Ningeb Yesu Kristu megen gar wanbe Al Kurun gaha inyin:

“Gebe al beles ge nin ten dapna gasa yirde, det galak nirwon yen ma nurde hinhan.

Ningeb metenge ten ten nin ne gago al nirarin.

<sup>6</sup> Gebe al beles dapna kumba ten galak girde, kurab mata bulun halde halde nin galak girde hanyen goke amanen ma nurde hinhan.

<sup>7</sup> Irkeb ne beles, ‘Al Kurun, ga nena! Asande yitin gwahade po dufayge gama ire yen wayhem,’ ginmirin,” yitin hi. *Tikin 40:6-8*

<sup>8</sup> Yesube mehendeb, “Gebe al beles ge nin ten dapna gasa yirde, det galak girde, dapna kumba ten galak girde, kurab mata bulun hal hal nin galak girwon yen ma nurde hinhan. Gwaha gird gird nin amanen ma nurde hinhan,” yirin. Al Kurun galak ird ird mata gwahade gobe Moseyen sabare yitin gega, Al Kurunbe goke ma nurde hinhan. <sup>9</sup> Irdeb Yesu beles basan henbe, “Al Kurun, ga nena! Nebe dufayge gama ire yen wayhem,” yirin ningeb, Yesube mere kame tiyyin gwahade po mata gergen forok ire yenbe mehenbe galak



mata bikkek niŋ yiriŋ gobe pel iryiŋ. <sup>10</sup> Yesu Kristube gwaha mat wawuŋ uŋkureŋde gog po yiŋgeŋ Al Kuruŋ galak iryiŋ. Irkeb gore po neŋbe Al Kuruŋ diliŋde wukkeŋ hitiriŋ.

<sup>11</sup> Moseyen saba gama irde naŋkahalminŋ naŋkahalminŋ pris beleŋ tumŋaŋ huwarde altare dapŋa gasa yirde Al Kuruŋ galak irde mata buluŋ halde halde metenŋ tenŋ tebaŋ po tenŋ haŋyen. Gega dapŋa darim gore mata buluŋ epte ma halde siŋa irtek hinhin. <sup>12</sup> Goyenbe Yesube alyen mata buluŋ halde yunke goyare po hubu hiyyenŋ yeŋ nurdeb wawuŋ uŋkureŋde yiŋgeŋ Al Kuruŋ galak irde kamyiŋ. Irdeb Al Kuruŋ hitte hurkuŋ hanŋ yase beleŋ keperde Doyaŋ Al Kuruŋ hiriŋ. <sup>13</sup> Irdeb asogomiŋ yago yawaŋ kahaŋ miŋde yufurka tenŋ tenŋ nalu niŋ doyaŋ heŋ hi. <sup>14</sup> Yeŋbe wawuŋ uŋkureŋde yiŋgeŋ tenŋ Al Kuruŋ niŋ galak iryiŋ geb, alya bereyamiŋ goyen Al Kuruŋ diliŋde al wukkeŋ yirtiŋ mar goyen hugiŋeŋ buluŋmiŋ kuram moŋ yiryiŋ.

<sup>15</sup> Holi Spirit wor goke meheŋde gaha yitiŋ Al Kuruŋyen asaŋde hi:

<sup>16</sup> “Ne Doyaŋ Al Kuruŋ gareb gaha yeŋ hime:

Kame nalu goyenter mel go hitte biŋa kuruŋ tenŋbe gaha yinenŋ:

Nebe dufaymiŋ bana sabane kereŋ, irde biŋde kayeŋ,” yitiŋ hi. *Yeremaia 31:33*

<sup>17</sup> Irde Holi Spirit gore sopte gaha yiriŋ:

“Nebe mata buluŋmiŋ halde yunenŋ.

Irdeb sopte mata buluŋmiŋ ge ma po nureŋ,” gwaha yitiŋ. *Yeremaia 31:34*

18 Ningeb yitiŋ gwahade po, mata buluŋ halde pasi irtiŋde gorbe sopte mata buluŋ hal hal goke dapŋa gasa yirde Al Kurunŋ niŋ galak ird ird mata gobe ma po hiyeŋ.

*Yul ma yetek, saŋiŋ po hetek*

19 Ningeb, kadne yago, Yesu beleŋ neŋ ge teŋ darimiŋ wok irde kamiŋ goke Gasuŋ Himam Wor Po Al Kurunŋ hire gor kafura ma heŋ igiŋ hurkutek hite. 20 Yesu kamiŋ gobe Gasuŋ Himam Wor Po bana hurkuŋ hurkuŋ beleŋ pet titiŋ amil goyen erek yiriŋ go gwahade goyen. Ningeb neŋ gayen Al Kurunŋya hugiŋeŋ hitek beleŋ gergeŋ wor po goyen kerd duniŋiŋ.

21 Irdeb al kura Al Kurunŋyen ya balem goyen doyaŋ irde hi al gobe neŋ hitte hi. Yeŋbe pris buda gote kurunŋmiŋ fudinde wor po, megen gar niŋ moŋ. 22 Ningeb neŋbe bininiŋde mat fudinde wor po yeŋ ge hekkeŋ nurdeb Al Kurunŋ hitte kutek. Neŋbe Yesuyen dari teŋ bininiŋde utiriŋ titiŋ, irde fe wukkeŋ beleŋ mata buluŋniŋiŋ haltiŋ geb, bininiŋde wukkeŋ wor po nurde hite. Ningeb Al Kurunŋ hitte kuŋ kuŋ niŋ kama ma heŋ hitek.

23 Irde neŋ hitte biŋa tiyyiŋ al gobe yiriŋ gwahade po fudinde tiyyeŋ geb, dufay budam ma heŋbe yeŋ ge hekkeŋ nurde hite yeŋ hityen goyen tareŋ po tanarde hitek. 24 Irde kadniŋiŋ ge amaŋeŋ nurd yuneŋ yuneŋya mata igiŋ teŋ tenya goke kurut yeŋ hitek yeŋ kadam tareŋ gird teŋ hitek. 25 Irde al kura marbe gabu teŋ teŋ niŋ bada heŋ hanŋen gega, neŋbe gwaha ma teŋ hitek. Gabu teŋbe kadam saŋiŋ gird teŋ hitek. Hanŋa gayenbe yeŋ mulgaŋ heŋ waŋ waŋ nalu

binde heñ hi geb, gabu heñ kadom tareñ gird ten ten mata gobe sanjñ po irtek.

<sup>26</sup> Munañ Al Kurunyen mere fudinde nurd nurd ga mata buluñ ten ten niñ bada ma hetekbe det hoyañ kura mayke kamke Al Kurun galak irde mata buluñ goyen haltek belñenbe hubu wor po. <sup>27</sup> Al kura gwaha tinayñ marbe Al Kurun belen gote murun gem kafuram wor po yunkeb kak belen Al Kurun asogo irtñ mar kunga yiryen goke po doyañ henayñ. <sup>28</sup> Moseyen sabarebe al kura sabamiñ ma gama irtñ al gobe al irawa ma karwo belen al gote mata buluñ goke merere huwarde tagalkeb al goyen buninen ma irde mayke kamyen yitiñ geb, gwaha ten hanen. <sup>29</sup> Moseyen saba uliñ goke wor al gwahade yirde hanen. Niñgeb al kura Al Kurun Urmiñ harhok unen sukal irde hi al gobe daha iryen? Al gobe Al Kurun biña kurun tiyyiñ goyen Yesu belen gama irde dari wok irde kamyiñ gore po al wukken hiriñ gega, Yesu darim wok irde kamyiñ goyen ten kari kari irde hi irde Holi Spirit al buninen yirde igiñ igiñ yirde hiyen al goyen sukal irde hi geb, gote murun gem buluñ kafuram wor po goyen tiyyen. <sup>30</sup> Goke tenbe Al Kurun belen Urmiñ gaha inyiñ: “Al kurate haniñ wol heñ heñ matabe nere geb, ne belen ga haniñ wol hewen,” inyiñ. Irde sopte gaha yiriñ: “Doyañ Al Kurun belen alya bereyamiñ goyen merem yañ yiryen,” yiriñ. Neñbe gwaha yiriñ al goyen nurd unen hityen. <sup>31</sup> Al Kurun gwahader hitiñ belen gwaha yiriñ geb, yende bearar bana hitek gobe kafuram wor po yen nurde hime.

<sup>32</sup> Niŋgeb haŋkapy Al Kurunyen mere fudinde hulsu yara go nurde dahade hinhan goke dufay henayin. Deŋbe kanduk kurayen kurayen yeneŋ hinhan gega, tareŋ po heŋ hinhan. <sup>33</sup> Kurarebe dukun al buda kurun diliŋ mar sukal dirde, mudunen hinhan. Irde kurarebe al kura kanduk gwahade yeneŋ hinhan marya heŋ yenya tumŋan kanduk bana hinhan. <sup>34</sup> Deŋbe al koyare heŋ kanduk yeneŋ hinhan mar goke bitin misiŋ nurde faraŋ yurde hinhan. Irde asogo dirde hinhan mar beleŋ samunŋin goran dirde hinhan gega, samunŋin megen gar nin mon, huginen hinayin go minyan yen nurde hinhan. Niŋgeb megen nin samunŋin goran dirtin goke ma nurde aman heŋ hinhan.

<sup>35</sup> Niŋgeb, kanduk dahade kura keneŋ hinayin gega, Al Kurun nin hekken nurtin goyen tubul ma po tinayin. Gote murun gembe igin wor po, irde kurun wor po. <sup>36</sup> Niŋgeb det igin goke doyan heŋbe araneŋ yul yen bada ma henayin. Gogab Al Kurunyen dufay gama irde meten teŋbe yen beleŋ detmin dunen yen bin tiyyin goyen tenayin. <sup>37</sup> Yenbe heŋ ga mon wayyen goke gahade katin: “Al wayyen yitin al gobe wayyen.

Waŋ waŋ nalumin singir ma iryen.

<sup>38</sup> Delner al huwak gobe ne nin hekken nurde hinayin.

Gega al kura nubul tiyyen al gokeb amanen ma nurd unen,” yirin. *Habakuk 2:3-4*

<sup>39</sup> Niŋgeb neŋbe dufayninin sorkok heŋ Al Kurun tubul teŋ kun bulun hetek mar mon. Gwahade yarabe yen ge hekken nurdeb yenya huginen hitek mar.

# 11

## *Al Kurunj ninj hekkej nurtek*

<sup>1</sup> Be, al kura Al Kurunj ninj hekkej nurde han marbe Al Kurunj belen det kura yunen yeke goke doyanj henjabe fudinde wor po dunyen go yenj nurde ga hanjen. Irde det kura dilinde ma yintinj gega, Al Kurunj belen goke yitinj geb, det gobe fudinde hi yenj dufay budam ma henj hanjen.

<sup>2</sup> Asinininj yagobe Al Kurunj ninj hekkej nurde hinhan. Irkeb goke Al Kurunj belen dilinde iginj wor po yenenj hinhin. <sup>3</sup> Neñbe Al Kurunj ninj hekkej nurde hite. Ningeb megenya nanjinya irde det kurunj gayen yenj belenj mohonj po yeke forok yaminj goyen bebak tenj hityen. Irde det kurunj gabe det kura dilnininj yenenj hite gare ma yiryinj yenj nurde hityen.

<sup>4</sup> Be, Abelbe Al Kurunj ninj hekkej nurde hinhin. Ningeb yenj belenj Al Kurunj ninj galak iryinj gobe iginj wor po, itinj Keinyen folek. Ningeb Al Kurunjbe det Abel belenj galak iryinj goke amanenj nurhem yirinj. Irdeb Abel belenj yenj ge hekkej nurde hinhin goke al huwak inyinj. Abelbe kamyinj gega, yenj belenj Al Kurunj ninj hekkej nurde hinhin mata gobe gayenter wor neñ belenj gama irtek mata hi.

<sup>5</sup> Be, Enokbe Al Kurunj ninj hekkej nurde hinhin. Ningeb dilinj gergenj hikeya Al Kurunj belenj yingenj hitte tukukeb bemel po bana kurinj. Irkeb al kura ulinj hakwam go ma po kenaminj. Al Kurunj ninj hekkej nurde hinhin goke Al Kurunj belenj dilinde iginj wor po kinyinj. <sup>6</sup> Fudinde, al kura Al Kurunj ninj hekkej ma nurde hi al gobe

Al Kurun belen matamin goke amanen ma nurde hi. Ningeb Al Kurun hitte kun han marbe Al Kurunbe hi goyen fudinde yen nurde hinayin. Irde yen ge sari kerde nankenen han mar gobe Al Kurun belen gote murungem igin yunyen goyen wor fudinde yen nurde ga hinayin.

<sup>7</sup> Be, Noabe Al Kurun nin hekken nurde hinhin. Ningeb kame mata forok yiyyen goke Al Kurun belen inke nurdeb meremin po gama iryin. Irdeb hakwa kurun wor po kura irdeb dirinminmin goyen daha kamnak yen hakwa bana gon yiryin. Yen belen mata gwaha tiyyin goreb goyenter nin alya bereyat mata bulun kawan yikala yiryin. Irkeb Al Kurun nin hekken nurde hanjen mar Al Kurun belen al huwak yinen hiyen gwahade po, yen wor al huwak inyin.

<sup>8</sup> Be, Abrahambe Al Kurun nin hekken nurde hinhin. Ningeb Al Kurun belen hoy irde nana kura kame yende hiyyende gor kwayin inke kurin. Yenbe nana gor yen ma nurde hinhin gega, nanamin tubul ten kurin. <sup>9</sup> Abrahambe Al Kurun nin hekken nurde hinhin. Ningeb nana kura Al Kurun belen unen yen bin tiyyin nanare gor kurin gega, albak hen kun hitin yara hinhin. Nana gobe kame urmin Aisakya asem Yekopyat nana hiyyen gega, tumnan albak hitin yara dapna sikken belen po ya irtinde hen kun hinhan. <sup>10</sup> Abrahambe megen gar nin taun nin ma nurde hinhin. Yenbe taun kura epte ma bulun hen huginen hitek goyen goke po nurdeb nanamde goyen albak yara hen kun hinhin. Taun huginen hitek gobe Al Kurun belen po gwaha

gwaha iren yey dufay henbe iryin.

<sup>11</sup> Be, Abrahambe alik bulun wor po hiri, irde berem Sara manan diri kawan kertek ma hiri. Goyenbe Abraham go Al Kurunbe bin tiyyin gwahade po forok irde nunyen yey yey ge hekken nurde hinhin. Niŋgeb Sara gob bin hen diri al diri kawan kiryin. <sup>12</sup> Al go alik bulun wor po epte ma diri minyan hetek gega, yey hitte mat al budam wor po fuful tiyyin. Al fuful tiyyin goyenbe dinambeya makan feren de nin sawsawa yara epte ma kapyan hetek gwahade hamin.

<sup>13</sup> Be, mel gabe tunan Al Kurun nin hekken nurde kun kunbe kamamin. Mel go megen hen yabe Al kurun belen detmin yunen yey bin tiyyin goyen ma yawaramin. Goyenbe det go kame kame gwahade forok yiyyen yey nurdeb goke aman hen hinhan. Irdeb, “Nenbe megen gar nin mon, albak yara hen belen hite,” yey hinhan. <sup>14</sup> Gwaha yey hinhan gobe, “Nananin fudindebe hoyan hi,” yey nurdeb gogo yey hinhan. <sup>15</sup> Munan mel gore megen nin nanamin yubul tiyamin goke dufay ug po hen hinhan manhan hakot po mulgan hen kuwon. <sup>16</sup> Gega gwaha ma tiyamin. Gwaha titnenbe mel gobe nana igin Al Kurun hiyende gor kunin yey goke po nurde hinhan. Irkeb Al Kurunbe mel goke nurde taun kura megen nin yara mon goyen yunen yey gitik iryin. Niŋgeb Al Kurunbe mel gore Al Kurunnin inen inen goke memya ma hen hiyen.

<sup>17</sup> Be, Abrahambe Al Kurun nin hekken nurde hinhin. Niŋgeb Al Kurun belen tunan ure yey ur-

miŋ Aisak niŋ inke meremiŋ po gama irde urmiŋ go Al Kurun niŋ galak iryiŋ. <sup>18</sup> Bikkeŋ Al Kurun belen Abraham diliŋde biŋa tenyabe, “Fonŋe yago niŋ biŋa tihim gobe urge Aisak hitte mat forok yenayiŋ,” inyiŋ. <sup>19</sup> Niŋgeb Abraham go Al Kurun belen gwahade biŋa tiyyiŋ go bebak tenbe, “Al Kurunbe urne maymeke kamyen goyen igiŋ sopte isan hiyyen,” yen hekkeŋ nuryiŋ. Irde urmiŋ mayen tike Al Kurun belen bada hawa inyiŋ. Niŋgeb mata goke tenbe, “Abrahambe urmiŋ kamtiŋ goyen Al Kurun belen isan heŋ tumulgan ten unyiŋ,” yen hanyen.

<sup>20</sup> Be, Aisak wor Al Kurun niŋ hekkeŋ nurde hinhin. Niŋgeb urmiŋ waran Yekopya itiŋ Isoya hitte kame mata dahade forok yenayiŋ yen nuryiŋ gwahade po guram yirde sanŋiŋ yiryiŋ. <sup>21</sup> Yekop wor Al Kurun niŋ hekkeŋ nurde hinhin. Niŋgeb alik bulun wor po heŋ kamen ten henyabe Yosep urmiŋ waran hitte kame mata dahade forok yenayiŋ yen nuryiŋ gwahade po guram yirde taren yiryiŋ. Irdeb genuŋmiŋ hende tawun heŋ huwarde henyabe Al Kurun dolon iryiŋ.

<sup>22</sup> Be, Yosepbe Al Kurun niŋ hekkeŋ nurde hinhin. Niŋgeb yen kamen ten henyabe kame kame Israel mar goyen Isip naŋa tubul ten kunayiŋ goke tagalyiŋ. Irdeb Israel mar goyen kuniŋ yenbe kiŋkiniŋ manan yade goya kun nanamde gab mete ten ten niŋ yinyiŋ.

<sup>23</sup> Be, Mose naniŋya miliŋyabe Al Kurun niŋ hekkeŋ nurde hinaryum. Niŋgeb urmiŋ Mose kawan hekeb diriŋ maliŋen moŋ yara kenaryum. Irdeb Isip niŋ doyan al kurun belen diriŋ mukŋen



al dirin kawan hekeb gasa yirke kamnayin yirin goke kafura ma haryum. Irde Mose kawan hiriᅇde mat gagasi karwo gayen bana kerde hike kun kun kurun hiriᅇ.

<sup>24</sup> Be, go kamereb Isip niᅇ doyaᅇ al kurun Fero wirin beleᅇ Mose teᅇ yende urmiᅇ yara irke kun kun kurun hiriᅇ. Goyenbe Mosebe Al Kurun niᅇ hekkeᅇ nurde hinhin niᅇgeb, kamebe Fero wirin gote urmiᅇ heᅇ heᅇ goyen pel iryiᅇ. <sup>25</sup> Yeᅇbe Fero wirin gote urmiᅇ heᅇ deᅇem yaᅇ heᅇbe beleᅇ meᅇen niᅇ mata buluᅇ niᅇ amaᅇ hetek hinhin. Gega pel irde Al Kurunyen alya bere beleᅇ kanduk yeneᅇ hinhan goyen yeᅇ wor mel goya heᅇ tumᅇaᅇ kanduk yentek beleᅇ goyen po gama irde hinhin. <sup>26</sup> Yeᅇbe gwaha teᅇ hinhin gote muruᅇgembe kame Al Kurun beleᅇ kurun wor po nunyen yeᅇ nurde hiyen geb, Israel marya heᅇ kanduk yeneᅇ yeneᅇ gobe det kurun, munan Isip naᅇare niᅇ samuᅇ kusamuᅇ wor po yad yad gobe det dirneᅇ yeᅇ nurde hinhin. Yeᅇ beleᅇ gwaha teᅇ hinhin gobe Yesu Kristu niᅇ teᅇ gogo teᅇ hinhin yeᅇ nurde uney hime. <sup>27</sup> Mosebe Al Kurun niᅇ hekkeᅇ nurde hinhin. Niᅇgeb Isip niᅇ doyaᅇ al kurun beleᅇ yeᅇ ge biᅇ ar yiriᅇ goke kafura ma heᅇ Isip tubul teᅇ kuriᅇ. Yeᅇbe Al Kurun banare hitiᅇ goyen kinyiᅇ geb tareᅇ po hinhin. <sup>28</sup> Be, Mosebe Al Kurun niᅇ hekkeᅇ nurde hinhin. Niᅇgeb Pasoba dula mata teᅇ sipsip gasa yirde dari yade yame kantayaᅇ sam yirde yukunayiᅇ yinke gwaha tiyamiᅇ. Irkeb Al Kurunyen miyoᅇ, alya dapᅇayat dirin mataliᅇ gasa yirke kamtek gore waᅇbe dari yamere go yeneᅇbe fole yirde

kukeb Israel marte dirinj matalinjbe ma kamaminj.

<sup>29</sup> Be, Israel marbe Al Kurunj ninj hekkej nurde hinhan. Nijgeb makañ ala kura Makañ Bukken inenj hanyen goyen Al Kurunj belenj pota irke kahalte megenj fudinj forok yirinj. Irkeb goyañ kuñ kurhan forok yaminj. Goyenbe Isip marbe Israel mar belenj tiyaminj gwaha tininj usi tenj kukeb makañ belenj aw yurke tumñanñ kamaminj.

<sup>30</sup> Be, Israel mar gobe Al Kurunj ninj hekkej nurde hinhan. Nijgeb naña fay 7 gayen nanñahalminj nanñahalminj Yeriko taun go milgu irde kuñ hinhan. Irkeb koya kurunj hora karkuwanj belenj po taun go milgu irtinj gobe gilgalañ irde kataminj. <sup>31</sup> Goyenbe belen ninj lelep bere kura deñembe Rahap gobe Al Kurunj ninj hekkej nuryinj. Nijgeb Israel mar al irawa kura Yeriko taun go kawemde naña tulyañ kure yenj kwaryum goyen Yeriko taunde ninj mar belenj gasa yirnak yenj hoy yirde yaminde bana yiryinj. Irkeb Yeriko taunde ninj mar goyen Israel mar belenj kuñ tumñanñ gasa yirde henjyabe Rahap munj po gab tubul tiyaminj.

<sup>32</sup> Be, Al Kurunj ninj hekkej nurde hinhan mar hoyañ gote barañ sopte momonj ma direñ. Gideon, Barak, Samson, Yepta, Dewit, Samuelyabe porofet yagoya gore mata tenj hinhan gote barañminj tagalenjbe ulyanjde kutek geb, gar po bada hewenj. <sup>33</sup> Mel gobe Al Kurunj ninj hekkej nurde hinhan. Nijgeb mel go kurabe megen ninj doyañ mar karkuwanj yakira tenj yende gasunde keperaminj. Irde kuraminjbe mata huwak mat al doyañ yiraminj. Irde kurabe Al

Kurun belen det igin yunen yen bin tiyyin goyen yawaramin. Irde kurabe laion kafuram wor po gote mohon fada yiramin. <sup>34</sup> Irde kuraminbe kak ala karkuwan bana yemeyamin gega go ma kamamin. Irde kurabe fulenare nin bidila belen gasa yirteke kamnan yamin gega, son hamin. Irde kurabe sanin minmon gega, Al Kurun belen taren yirinin. Kurabe fulenare nin mar taren minyan geb, nan hoyande nin fulena mar gasa yirde yakira tiyamin. <sup>35</sup> Bere kurabe dirinmin kamtin goyen sopte huwarke yenamin. Munan kurabe Al Kurun nin ten al hoyan belen bulun bulun yirke ulin misin kurun wor po katamin. Gega kame Al Kurun belen disan hiyyen go yen nurde kamde kamde nin kafura ma hen Al Kurun harhok ma unamin. <sup>36</sup> Irde kurabe al hoyan belen giwgiw yirde yusulak tiyamin. Irde kura marbe kahanya haninya fere yirde yukun koyare yeramin. <sup>37</sup> Mel gobe horare gasa yirke kamamin, irde he walde walde det belen kahal yon yurke kamamin, irde kurabe fulenare nin bidilare po gasa yirke kamamin. Mel gobe det nin amu wor po hen hinhan, irde kurabe ulin unna igin mon sipsipya memeyat sikken kerkek wor po goyen hor yirde hinhan. Mel gobe al buninen, det minmon wor po, irde al hoyan belen nanyan yirde bulun bulun yirde hinhan. <sup>38</sup> Megen nin marbe al gwahade goyen goke igin ma nurde hinhan geb, mel go gor kura kun igin kepertek minmon hamin. Mel gobe gwaha yirkeb sawsawa po kurun nan bana hinhan. Munan kurabe duguyan kun horabok bana hinhan. Irde kurabe megen yameyan hen kun hinhan.

<sup>39</sup> Be, al buda kurunj goke tagalhem mar gobe Al Kurunj ninj hekkej nurde hinhan. Ninjeb Al Kurunj belej nere alya bereya fudinde yej nurde yunij. Goyenbe mel gobe Al Kurunj belej det yunen yej bija tiyyij kurunj goyen kura ma taminj. <sup>40</sup> Al Kurunbe mel go po monj, nejj gayen wor yej belej bija tiyyij gote iginenj iginj wor po goyen yunmeke yenya nenya tumnanj bulun minjon iginj wor po henayinj yej nurdeb gogo aranj ma yunij.

## 12

### *Yesu po gama irde hitek*

<sup>1</sup> Ninjeb Al Kurunj ninj hekkej nurd nurd mata dikala dirtinj mar gwahade gobe budam wor po nurd yunen hite geb, Al Kurunj ninj hekkej nurd nurd belej pet dirtek detbe yade sinja yirtek. Irde mata bulun, nejj gayen bulun dirke katenj hityen goyen yubul po titek. Irde gab al kura kup yej yej karire hej kup yej kunj pasi irde hanjen yara, nejj wor megen gar henya Al Kurunjen dufay gama ird ird belej kerd duntinj goyen kunj kunj bada ma hej kurut wor po yej hitek. <sup>2</sup> Yesube Al Kurunj ninj hekkej nurd nurd mata gote minj al, irde go mata goyen iginj wor po irtek al. Ninjeb nejbe Yesu yej unjurenj ninj po dufay hej hitek. Hoyanj hoyanj ninj ma nurtek. Yenjbe kame Al Kurunj belej turunj iryenj goyen nurde hinjin geb, kuruse hende kamde kamde ninj memya ma hejbe ulinj misinj katenj kamyinj. Irdeb kamyinde mat huwardeb Al Kurunj hitte hurkurinj. Hurkunbe Doyanj Al Kurunj hej Al

Kururujen hanin yase belen kipiririn. <sup>3</sup> Irde mata bulun mar belen bulun bulun irde hike goke mukku ma ten goya goya sanin po hinhin goke dufay hena ko. Gogab den wor Al Kurun gama ird ird goyen yul ma yen bada ma henayin.

*Al Kurunbe huwak dire yenbe kurareb kanduk yubul tike forok yen hanjen*

<sup>4</sup> Denbe mata bulun ma ten hitek yen kurut wor po yen han. Goyenbe mata bulun asogo irde han goke kura ma kamde han. <sup>5</sup> Irde Al Kurun belen dirine yago dinenbe taren hen hen ge faran durtin goyen bitin sir yen hi. Taren dirtek mereminbe gahade:

“Dirine, Doyan Al Kurun belen saba girde hiyen goyen kari kari ma irayin.

Irde mata bulunge goke ginen tikeb bulunen ma nurde hayin.

<sup>6</sup> Doyan Al Kurunbe alya bereya bubulkunen wor po yen nurde yunen hi goyen saba yirde kukalde hiyen.

Irde Al Kurun belen al kura nere yen nurde unen hi al gobe mata bulun tike bebak tiyyi yenbe gote murungem bulun unen hiyen,” yitin hi.

*Mata Igin 3:11-12*

<sup>7</sup> Ningeb Doyan Al Kurun belen saba dirde kukalde dunke goya busahard hard nin ma nurde hinayin. Yenbe al belen dirnen wen saba yirde hanjen gwahade goyen po, nen gayen saba dirde hiyen. Al kura urmin saba ma irde hiyen kenem dirin gobe urmin yende wor po mon. <sup>8</sup> Dirinbe tumnan nanin yago belen saba yirde huwa yirde hanjen. Goyenbe adotin belen den goyen saba

dirde huwa ma dirde hinayinbe denbe yende dirnen wen fudinde mon. <sup>9</sup> Nenbe nanninin yago megen nin belen saba dirde huwa dirde hanjen goyen goke palap yirde hityen. Nin geb det kawan hanya banare hanya gote min al Al Kurun gore nen gayen yensa huginen hen hen ge ten saba dirde huwa dirde hike dahade geb palap ma irtek? Epte mon, palap po irtek. <sup>10</sup> Nanninin yagobe dufayminde igin yen nurde hinhan belen goyen gama irde nen gayen belnen po saba dirde kukalde dunen hinhan. Munan Al Kurunbe nen gayen yingen yara dilinde wukken wor po hewon yen saba dirde huwa dirde hien. <sup>11</sup> Goyenbe saba dirde huwa dirde hikeb bininde misin nurde hityen geb, saba dird dird ninbe amanen ma nurde hityen. Gega bininde misin gwahade nurde gab kenkela bebak tenbe Al Kurun dilinde igin mata huwak ten hitek. Irdeb bininin kamke igin po hitek.

### *Kenkela hen hinan ko*

<sup>12</sup> Nin geb Al Kurunen mere tanartek taren minmon irde meremin gama irde kutek sanin manan hubu kenem gor po bada ma henayin. Sopte taren po hen gama irde kun hinayin. <sup>13</sup> Irde mata huwak ten ten belentin goyen sope yirde huwa yirde hinayin. Gogab mata huwak ten ten taren dirnen mun po hi goyen sopte kurun heke igin gama irde kun hinayin.

<sup>14</sup> Nin geb gwahade hitek yenbe bitin kamke al buda kurun goya awalikde hen hen ge kurut wor po yen hinayin. Irde Al Kurun dilinde wukkeken hen hen ge kurut wor po yen hinayin. Al Kurun

dilinđe wukke ma hinayinbe epte ma Al Kurun kennayin geb, gago dinen hime. <sup>15</sup> Irde kuratin kura son henbe Al Kurun belen buninen dirde igin igin dirde hi bana goyen ma hinak geb, kenkela hen ga hinar ko. Irde he bulun kura\* belen he hoyan igin goyen salaw yurde tukun hanyen gwahade yara, mongo den han bana al kura belen dufay bulun kerde wanbe dende dufay tumnan bulun yirnak geb, goke kenkela hen ga hinar ko. <sup>16</sup> Aisakye urmin matalin Iso gobe Al Kurun belen guram irde sanin wor po irwon. Goyenbe binje kamiyin goke ten Al Kurunyen tarende nanin belen guram irde taren ird ird goyen goke ma nurdeb pel iryin. Ningeb denbe Iso belen mata tiyyin gwahade ma ten hinayin. Irde lelep mata ma ten hinayin. <sup>17</sup> Isobe kame bin bak yeke Al Kurunyen saninde guram nirde taren niryen yen nanin gusunan iryin gega, nanin belen meremin ma nuryin goyen denbe nurde hanyen gogo. Yenbe esenya esenya nanin gusunan iryin gega, Al Kurun nin bin mulgan hen mata bulun tubul titek nalube bikken hubu hirin geb, gogo son hirin.

*Nenbe Al Kurunyen Yerusalem bana hite*

<sup>18</sup> Be, asetin yagobe kun Sainai dugu kahan minde forok yamin. Gor forok yenbe kak melak kurun forok yeke kenamin. Irde kidoma taren wor po kukuwamnen belen dugu go aw urde mene kurun forok yeke kenamin. Goyenbe den wayan dugu gabe bikken asetin yago belen Sainai

---

\* **12:15:** He gayenbe nendeb buwi he go gwahade.

dugu keneḡ ufuramiḡ gwahade moḡ. <sup>19</sup> Asetiḡ yagobe Sainai dugure gor bigul fuk irke nuramiḡ, irde al melak kura saniḡ miḡyaḡ wor po naḡkiḡde mat forok yeke nuramiḡ. Irdeb kafura wor po heḡbe, “Neḡ gahade gare mere gwahade nurtek moḡ. Niḡgeb sopte goya mere ma dirwoḡ yeḡ nurde hite,” yamiḡ. <sup>20</sup> Mel gobe Al Kurunḡ beleniḡ, “Al kura dugu gayen ufurnayiḡbe hora beleniḡ gasa yirke kamnayiḡ. Dapḡa wor gwahade po yir-nayiḡ,” yiniḡ goyen nurdeb kafura heḡbe sopte nurtek ma yiriḡ. <sup>21</sup> Mel gore mata kenamiḡ gobe kafuram wor po geb Mose wor, “Kafura heḡ ulne barbar yeḡ hi,” yiriḡ.

<sup>22</sup> Goyenpoga dugu deḡ wayaḡde gab Sainai dugu gwahade moḡ. Deḡbe Saion dugure wayaḡ. Dugu gobe megen niḡ moḡ, Al Kurunḡ gwahader hitiḡ gote taun. Taun gobe Al Kurunḡyen gasuḡde niḡ Yerusalem. Deḡbe Al Kurunḡyen miyoḡ bu-dam wor po epte ma kapyaḡ hetek goyen gabu irtiḡde wayaḡ. <sup>23</sup> Gorbe Al Kurunḡyen diriḡeḡ weḡ tumḡaḡ gabu irtiḡ haḡ. Yende deḡembe Al Kurunḡyen gasuḡde gor haḡ. Irde dende wor gor haḡ. Irde al beleniḡ diriḡmiḡ mataliḡ guram yirde tareḡ yirde haḡyen gwahade yara, Al Kurunḡ beleniḡ deḡ goyen guram dirde tareḡ dirde hi. Yeḡbe alya bereya tumḡaḡ al igiḡya buluḡya pota yirde gote muruḡgem yunenḡ yunenḡ al. Deḡbe Al Kurunḡ gwaha teḡ hiyen al goya al huwak Al Kurunḡ beleniḡ buluḡmiḡ kuram moḡ igiḡ wor po yirtiḡ gote toneniḡ gor gabu irtiḡ haḡ. <sup>24</sup> Irdeb deḡ wor Yesu hitte wayaḡ. Yeḡbe alya bereya niḡ teḡ Al Kurunḡ hitte kuḡ Al Kurunḡ beleniḡ biḡa gergeḡ tiyiḡ goyen



sanin irde gote iginen forok irdeb alya bereyat mata bulun halde halde nin tenbe darim wok irde kamyin. Yesuyen dari gobe Abel mayke darim wok yirin go goya tunande mon. Abelyen daribe al go mayke kamke dari go kenenbe Al Kurun belen mayyin al goyen wol hirin geb, dari gobe wol hen hen de nin dari. Ningeb Yesuyen dari gobe Abelyen dari gote folek.

<sup>25</sup> Ningeb Al Kurun belen mere dirke pel irnak geb, kenkela hen hinan ko. Bikkenbe megen nin al nindiken yara Mose belen asetin yago Israel mar saba yirde hayhay yirke meremin pel iramin gote murungem bulun wor po tamin. Munan gayenterbe Al Kurun, Mose gote folek gore saba dirde hayhay dirke ga pel irnayinbe gote murungembe dahade tetek yen nurde han? Asetin yago belen tamin gote folek wor po tenayin geb.

<sup>26</sup> Al Kurun belen Sainai dugure katen mere tiyyin goya goyenbe megenya dugu kurun goya angor yirin. Goyenbe gayenter nin yen Al Kurun belen bin tenbe, “Kamebe sopte megen ga angor iren. Nan kin manan gwaha iren,” yirin. <sup>27</sup> Mere bilmin “Kame sopte angor yiren,” yirin gote minbe kame wanbe det angor yirke korgon henayin goyen tunan gwamun yuryen goke yirin. Korgon henayin det gobe megenya nan kinnya irde det kurun yingen yirin goyen goke yirin. Korgon ma henayin detbe huginen hinayin.

<sup>28-29</sup> Ningeb Al Kurun belen alya bereyamin doyan irde hire gobe ugala mun kura ma tiyyen geb, huginen kin kin hiyen goke Al Kurun igin nurd untek. Irde Al Kurunbe kak yara geb, alyen

mata bulur niŋ iŋiŋ ma nurdeb kumga yirde hiyen geb, palap irde kafura irdeya dolon irde hitek.

## 13

### *Al hoyan niŋ amanen nurtek*

<sup>1</sup> Niŋgeb denbe Yesuyen alya bereya hoyan kadtin hamin goyen dende dari wor po yara nurdeb yen ge amanen nurde yunen hinayin.

<sup>2</sup> Irdeb al tinen kura yenenbe gargar yird yird niŋ bitin sir ma yen hiyen. Al kura Al Kurunyen miyon yen hitte wayamin gega, bebek ma tenya gargar yiramin geb, gago dinen hime. <sup>3</sup> Irde Yesu niŋ ten koyare han mar goke bitin sir ma yen hiyen. Mel goke dufay henya den wor yena tumnan koyare hite yara nurde henya faran yurde hinayin. Irde al kura bulur bulur yirke kanduknen nurde han mar goyen yenenbe goke buninen yirde den wor yen misin nurde han gwahade yara nurdeya faran yurde hinayin.

<sup>4</sup> Be, alya bereya ire unya hen hen mata gobe Al Kurun belen iryin geb, mata go palap irde bulur ma irde hinayin. Munan al kura berem yan gore bere hoyanya duwan ten ten mata ten han marya lelep mata hoyan kurayen kurayen ten han marya gobe kameb Al Kurun belen merem yan yiryen. <sup>5</sup> Irde hora niŋ ugun po ma dufay hen hinayin. Al Kurun belen, “Nebe epte ma gakira tiyen, irde epte ma gubul tiyen,” yirin geb, hora mun kura hikeb gago ep yen nurde hinayin.

<sup>6</sup> Al Kurun belen gwaha yirin geb, nenbe yen ge hekken nurdeb, “Doyan Al Kurunbe faran nurd

nurd al geb, epte ma kafura hewen. Megen nin mar beley ne gayen epte ma bulun nirnayin,” yen nurde hitek. <sup>7</sup> Irde den goyen Al Kurunyen mere saba dirde hinhan mar, dende doyan mar goke bitin sir ma yen hiyen. Irde Al Kurun nin hekken nurde mata ten henbe gote iginen forok yen hike yenen hinhan goke dufay henbe yen mata ten hinhan gwahade po ten hinayin.

<sup>8</sup> Fudinde, Yesu Kristube bikken hinhin gwahade po, hanka gayen hi. Irde kame manan huginen hiyen. <sup>9</sup> Ningeb al kura saba hoyan tawan bitin yawarnin tike mali mali ma gama yirde hinayin. Al Kurun dilindebe binje nen nen mata gore epte ma dufaytin taren iryen. Al Kurun beley buninen dirde igin dird dird saba go kenkela bebak tike gab dufaytin taren hiyyen. Binje nen nen mata nin yitin saba bikkek go gama irde hinhan marbe gote iginen kura ma po yawaramin.

<sup>10</sup> Nejen hittebe Al Kurun galak ird ird alta kura hi. Goyenbe Israel marte pris megen nin gasun himam Al Kurun dolon ird ird bana gon hurkun meten ten han mar gobe nende alta hende gor det Al Kurun galak irtin goyen epte ma yade nenayin. <sup>11</sup> Yende saba bikkekdebe pris buda gote kurunminbe alyen mata bulun halde yune yen dapna gasa yirde darim po ten Gasun Himam Wor Po bana gon hurkun hiyen. Munan gasonbe Israel mar tiyun ten hanjen sinare yukun kunga ten hiyen.

<sup>12</sup> Ningeb Yesu wor darimin wok irde kamke gore po alye bereyat mata bulun halde halde nin

Yerusalem taun siñare uliñ misin kurun katen kamyin. <sup>13</sup> Niñgeb neñ wor Yesu niñ teñ bulun dirke yul ma yeñ sañin po hetek. Irde Yesu belen kurin goyen po gama irde hitek. <sup>14</sup> Neñbe megen gar niñ taun kura hugiñen hiyeñ goke ma nankenen hite. Gwaha titñenbe kame forok yeñ hugiñen hiyeñ taunde hurkun hurkun niñ nankenen hite.

<sup>15</sup> Niñgeb Yesuyen tareñde Al Kurun hugiñen kasor irde hitek. Gobe Al Kurun galak ird ird mata geb, moñonniñde deñe urde isoka irde hitek. <sup>16</sup> Irde al hoyan igin igin yirde, al kura det niñ amu heñ han mar faran yurd yurd niñ bitin sir ma yeñ hinayin. Al Kurun belen matatin go kenenbe ne galak nirde han yeñ nurdeb amanen nurd dunyen.

<sup>17</sup> Be, denbe den Yesuyen alya bereyat doyan marte mere nurde gama irde hinayin. Irde yende yufukde heñ mata teñ hinayin. Mel gobe den belen Al Kurunen mere kenkela gama irnayin yeñ Al Kurun belen meten yuntin geb, doyan dirde han. Niñgeb meremin nurde gama irde hinayin. Gogab mel gobe meten teñ hanjen goke bulunen ma nurde aman heñ hinayin. Gwaha ma tinayinbe metenmin gore faran ma duryen.

<sup>18</sup> Irde neñ ge Al Kurun gusunan irde hinayin. Neñbe bininiñde mat wukken wor po nurde hite, irde mata huwak po teñ hitek dirde hiyen. <sup>19</sup> Irdeb Al Kurun gusunan irde henyabe yeñ belen aranen nad nerke den hitte kun kun niñ wor gusunan irde hinayin.

<sup>20</sup> Be, Doyan Al Kuruninin Yesube neŋ sipsip yara gate doyan al kurun hirin. Yenbe Al Kurun belen bin tiyyin huginen hitin goyen tareŋ ire yen darim wok irde kamyin. Irkeb Al Kurun belen kamtinde mat isan hirin. Al Kurun gwahade gobe bin kamke igin heŋ heŋ gote min al.

<sup>21</sup> Ningeb Al Kurun belenbe den goyen sanin heŋ dufaymin gama irde mata igin tinayin yen det igin kurun gitik ten dunwon yen nurde hime. Irde yen belen mata amanen nurde hitek goyen neŋ bana forok yirde hikeb Yesu Kristuyen tarende mata ten hiwon yen nurde hime. Yesu Kristube huginen denem turun yan hiyen. Fudinde wor po.

<sup>22</sup> Be, kadne yago, asan gabe den tareŋ dire yen kayhem gega, ulyan ma kayhem. Ningeb saba dirhem gayen al kura kapyan heŋ dunke pinen ma nurde kenkela palna irnayin. <sup>23</sup> Kadninin Timoti koyare hinhin gobe gayamun ga po ga sina iran goyen nurde ga hinayin. Timoti goyen heŋ ga mon ne hitte wakeb yenya tumnan den denye yen kuren.

<sup>24</sup> Nebe Al Kurunyen alya bereya tumnan denya han marya doyan martinya goke dufay heŋ himyen goyen den belen mel go momon yirnayin. Itali nanare nin Yesuyen alya bereya wor den ge dufay heŋ han goyen momon yirayin ninhan geb, gago bebak dirhem.

<sup>25</sup> Al Kurun belen den tumnan buninen dirde igin igin dirde hiwon yen gusunan irde hime. Gog po.

**Al Kurunyen Mere Igin  
The New Testament in the Gwahatike Language of  
Papua New Guinea  
Nupela Testamen long tok ples Gwahatike long  
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

---

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab